

## **Mepepelime ma Bulu a tyo ya Aza a Roma**

### *Ucuduwu wa aatagada a nda*

Bulu dana ta mepepelime ma nda a tyo aza e Itoni a Roma. A mantsa ma na Bulu danai aatagada a nda koto shi u bura Roma shi. Roma lyuci gbain da danai, waru ngono n na e deyi Kaisa a yuwan ta tsugono pe. Lyuci'i u dana ta na aza o urevu abunda pe. Bulu dana ta nu ugbozu adama u cuduwa ili i na Kristi Zamawawa yuwain atsuma e ifobi ya Asula a tyo o uvadi.

Bulu fara ta roco cine vuma suru oo o'wo za vu unusu e ekere a Asula, adama o ndolo a da za suru o'woi wukasu na Asula. Vuma aa gura dana ushiwun shi, amma Yesu tu ushiwun. Ana u kuwai kucci da wo o'woi o una wa ama suru, waru Asula a ca ta za suru na usuyi Yesu Kristi ucira u kucci'i.

Atsuma a aatagada a nda, aza e Itoni e te reve lon cine Yesu yuwain abajini o ulinga adama u wawa le. E te isawan ugbamu atsuma o ucawu wo okolo e le adama a na a gura reve mejege cine Asula ee inda le. Urevu u nda u ta zuwa a yuwan wuma mejege, waru u ta kamba le a damma ozo o ro adama e Yesu na cine waa wawa le fo.

### *Ili i na iri pe atsuma a aatagada a nda*

1. Bulu ni ikaka ya Aalabari a Sa'ani a yi (1:1-17)
2. Za suru ta nu unusu (1:18-3:20)
3. Ure u na Asula a ushishi ama (3:21-4:25)

4. Wuma u sa'avu adama a muwun ma Asula (5:1–8:39)
5. A te gba adama a ama a Isra'ila? (9:1–11:36)
6. Cine aa yuwan wuma u sa'avu wi icigi (12:1–15:13)
7. Ifobi ya Bulu ni icasu ya yi (15:14–16:27)

### *Ucuduwu*

<sup>1</sup> Amu Bulu da n danai mepepeline ma nda. Amu aagbashi e Yesu Kristi Zamawawa da. Asula a dangwa mu ta mo o'wo aajiya,† reve u lyungu mu n 'ya<sup>wa</sup> n yuwan alajiya a Alabari a Sa'ani a yi.

<sup>2</sup> De nu ujimu, Asula a yuwan ta nzuwulai ma Alabari a Sa'ani a nda e ekere a amasula a yi, ununa a danai atsuma a Aatagada a Akiza. <sup>3-4</sup> Alabari a Sa'ani'i u ta yuwusan adanshi adama a Mawun ma yi, Yesu† Kristi Zagbain tsu. A matsan yi ta vuma za na shi mawun ma tsukaya mo Mogono Dawuda.† Agba Ruhu na ri akiza roco ta nu ucira na Yesu Mawun ma Asula ma da, adama a na u 'ya<sup>san</sup> niyi o ukwa. <sup>5</sup> O ure wa Kristi Zamawawa da, Asula a ca numu ulinga u sa'ani wa aajiya. Ulinga u nda adama o rono ama e ida suru a usu avu a kuru da. N ta yuwusaan yi ulinga u nda. <sup>6</sup> Adu fo i ta pe atsuma a ama a na Yesu Zamawawa dangwai.

<sup>7</sup> N ta danasaa du aza a na a ri atsuma a abajini a lyuci va Roma† mepepeline ma nda. Asula a ciga du ta avu waru u de du yo o'wo ama a akiza a yi.

Lyawa Asula Dada tsu na Yesu Zagbain Zamawawa ca du isa'ani na asuvu nden.

*Bulu yuwain avasa avu waru u godyo*

<sup>8</sup> Lyawa n fara damma n godyo ta Asulā atsuma a ala e Yesu Zamawawa adama a du suru. N ta yuwusan ne adama a na ama a ta yuwusan adanshi o ucawu wo okolo a du ubata suru. <sup>9</sup> Asulā e reve ta a na n lyawai a yuwusaan du avasa shi, n ta yuwusaan yi aganda no okolo a va suru waru n ta casu Alabari a Sa'ani adama a Mawun ma yi. <sup>10</sup> Mantsa ma na maa yuwusan avasa biti, n tsu pati ta Asulā u lyawa mu m bura du, waru u to o'wo ne na Asulā a usu.

<sup>11</sup> N ciga ta me ene du, avu n ca du cu'un va aba'un a na Ruhu va Asulā ca numu. U ta kamba du i kungwa nu ucira atsuma a Zagbain. <sup>12</sup> N ta dansa n ciga ta tsu kambulai nu ucawu wo okolo a na tsu ri na ayi. Ucawu wo okolo a du u ta kamba mu, ucawu wo okolo a va waru u ta kamba du. <sup>13</sup> N'utsa n va, n ciga du ta i reve na n tsu dana ta e ifobi i na maa bura du. Agba ili i ro i tsu gesheshe mu ta kuci. N ciga ta n zuwa ama a kuru Zamawawa atsuma a Roma, ununa n yuwain na akapi a Atakpaci.

<sup>14</sup> Na n ciga n 'yuwan n yuwaan ama suru aganda: aza a na a ri Nheleni† na aza a na Nheleni n da shi, waru na aza a na a ri nu urevu na aza a na e revei ili shi. <sup>15</sup> Ayi da i zuwai n ri no okolo n yuwaan du alajiya a Alabari a Sa'ani atsuma a Roma.

### *Ucira wa Alabari a Sa'ani*

<sup>16</sup> Maa uwwusa wono adama a Alabari a Sa'ani† a Kristi Zamawawa shi, adama a na ayi da ucira u na Asulā aa yuwusaan ulinga adama u wawa za na suru cayi okolo, o ufaru aza a Isra'ila reve a kuru na Atakpaci. <sup>17</sup> Alabari a Sa'ani'i u to rocosu

cine Asulā aa tarasa ama na ābula† a makakan mā yi, ayi da o ure wu ucawu wo okolo diga o ufaru a tyo o ukosu. Unatā ni ili i na Adanshi a Asulā a dammai, “Ayi nda za na Asulā a tarasa za va ābula da a makakan mā yi, u tā tsurā wuma o unā u na u cayi Asulā okolo.” ◇

*Ama suru a nusan ta*

<sup>18</sup> Asulā za na ri zuva u to rocosu cine waa uwwusa upan wa ama adama a cu'un vu nusu ni iwuya i na aa yuwusan suru. E geshe tā amayun ni iwuya i le. <sup>19</sup> Asulā a ta casu le atsumalimā adama a na e reve tā ili i na i lobonoi na za biti ee reve a tyo e ekere a Asulā, adama a na Asulā o roco le tā ili i ndolo suru a alanga e eteshe. <sup>20</sup> Ama aa gura ene ucira wā Asulā u na u ri babu ukotu nu ure wa akiza u majiyan mā yi shi. Diga ana Asulā a yuwain uvadī, ili i na u yuwain suru i roco tā cine ayi u ri. Adama o ndolo ama a ri nu ure u motāa shi. <sup>21</sup> Ko na e revei Asulā, a 'yuwan ta a ca yi tsugbain ana Asulā a amayun, avu waru a 'yuwan o godyoo yi. Ana aa yuwan ne, reve majiyan me le mo o'wo ili ye pere. Okolo o tsulo tse le tsa shiwan tā ni irumbu. <sup>22</sup> A ta majiyan a tā nu ugbozu, reve gba o o'wo olo. <sup>23</sup> Aa yuwusaan Asulā a tsugbain za na ri wuma babu ukotu agandā shi. O unā u ndolo, reve a uwa a yuwusaan amali agandā a na a yuwain oroci a ama a na aa danā wuma babu ukotu shi, oḅolo no oroci a nnunu, ni inama, ni iyo.

<sup>24</sup> Adama a na a yuwusain ne, reve Asulā a lyawa le e eneshe. Reve a yuwan ili i na a cigai a yuwan suru, avu maluwa me iwuya me le ma

◇ **1:17** Hab. 2:4; Gal. 3:11; M.Ib. 10:38.

zuwa le e reme mayan mā tsipere. <sup>25</sup> A 'yuwan tā amayun a Asulā a yuwain agānda, ana a yuwaan tā ili i na Asulā a yuwain agānda, ana a yuwaan za na yuwan nle agānda. Ayi da za na aa ushishi ica babu ukotu. Ami.†

<sup>26</sup> Adama a na ama a yuwain ili i ndolo, Asulā a lyawa le tā a kuru re wono na a cigai. Amaçi a yuwusan tsipere na amaçi, agba ne da wu ntsayi shi. <sup>27</sup> Ali a ta yuwusan ne fo. A lyawa tā o vosun na amaçi reve e reme a uwwusa maluwa ma na oo von na ali na abunda lon. Reve a yuwan ili i wono vāni le, ili i na i cina nle ayi da oforo adama o tsulo tsa na a yuwain.

<sup>28</sup> Ama a yuwan tā majiyan ili ya aḅulā i da shi a danā nu urevu wa amayun wā Asulā. Daḅa gba Asulā a lyawa nle a karai no okolo e iwuya i le, avu u lyawa le a yuwan ili i na yi ntsayi aa yuwan shi, ko ke'en. <sup>29</sup> A tā tapu na cu'un vu unusu ni iwuya suru. A ciga tā o bolotowo aciyele ili biti. A ta 'yuwusan ama. A tā tapu na tsushu'un. A ciga tā mona, waru a ciga tā a yuwan nlangi vāni le. A tā a mpusunlai mu ugbozu. A ta majiyan me iwuya a tyo e ekere a ama. A ta yuwusan idami. <sup>30</sup> A tā lungususa ama ala. A ta 'yuwusan Asulā. Aa casu ko vuma tsugbain shi. A tā 'yasasan avangaci. A ta cuwusa aciyele. A ta yuwusan mpolo a yuwan iwuya e re sa'avu. Aa yuwusaan mbara n le tsutoni shi. <sup>31</sup> A ta yuwusan tsulo. A tā bulusa nzuwulai n le. O tsu roco isa'ani ko e ene iliyali yo ozo o ro shi. <sup>32</sup> E reve tā na wilā wā Asulā u dammai aza a na aa yuwusan nden n le ne tsunda, wu ntsaa tā a kuwā. Agba ili i ndolo i putsaa le a lyawa mayan me iwuya shi. Hali a ta

gbagbusa ozo o ro a yuwan ne fo.

## 2

### *Uge'etosu wa Asula*

<sup>1</sup> U ta yuwan i dana adansa, “Kai! Icu'un ya ama a na vaa yuwusan adanshi adama e le a ta ni iwuya lon!” Adu gba fo ama a wuya a da tse le, waru i ri nu ure u motaa shi! A mantsa ma na yaa dansa ele aza e iwuya a da waru a ta tsura atsumalima, i to kototsu aciyadu, adama a na cu'un vi ili i na yaa yuwusan dada ele fo aa yuwusan. <sup>2</sup> Tsu reve ta Asula a ta mejege a mantsa ma na wee ge'etosu ama a na aa yuwusan ili i nda. <sup>3</sup> I te ge'etosu aza a na aa yuwusan ili i na i ri ili yi idaba, agba adu na aciyadu fo i ta yuwusan ili i na i ri ili yi idaba'a. I ta majiyan i ta gura la'a uge'etosu wa Asula? <sup>4</sup> I tara isa'ani ya Asula ili i ro shi adama a na u tsu cashi atsumalima lo shi, avu u yuwusan ankuri na adu. Amayun i reve ta ili i na i zuwai Asula oo rocosu du isa'ani ayi da adama a na u ciga du ta i vadala a tyo ya'a yi.

<sup>5</sup> Agba i ta na aciyogbamu reve i 'yuwan a vadala ubata wa Asula. U ta zuwa du i sowo atsumalima a na a karalai, o urana u na woo roco upan wa yi, reve u ge'eto mejege. <sup>6</sup> U ta cuwa ko u ca vuma suru atsumalima e ekere e ili i na u yuwain. <sup>7</sup> Aza a na a lyuwai elime na mayan me ili i sa'ani adama a na a zama tsugbain ni ica na wuma u babu ukotu, Asula a ta ca le wuma'a. <sup>8</sup> Agba u ta tsun upan na atsumalima a yi a aci a aza a na aa yuwusan nden adama a uwwaa aciyele uyo'o goon, aza a na waru a 'yuwusan a kurusu amayun reve e reme

mayan me ili i wuya. <sup>9</sup> *Asulā* a ta zuwa aza a na aa yuwusan unusu kuci oo sowo *atsumalima*, reve waru a uwwa *mɓala*. Ili i nda i ta fara na aza a Isra'ila ne'en, reve o koso na Atakpaci. <sup>10</sup> Agba u ta ca za na aa yuwusan isa'ani biti, tsugbain, ni ica, na asuvu nden. Ili i nda i ta fara na aza a Isra'ila ne'en, *avu* o koso na Atakpaci. <sup>11</sup> Ne *da* u ri adama a na *Asulā* e te ge'etosu ama suru *unaṭa*.

<sup>12</sup> *Asulā* a ta ca Atakpaci *atsumalima* na a yuwan unusu, ko na e revei *Wilā* u na *Asulā* a cayi Musa shi. Waru u ta ca aza a Isra'ila *atsumalima* na a yuwan unusu, adama a na *a ta na Wilā*. <sup>13</sup> *Asulā* *a* tsu *kambato* ama *aza a abula a makakan ma* yi adama a na a uwwai ili i na *Wilā* waa dansa shi. Amma u tsu yuwan *ta* ne na aa yuwusan ili i na *Wilā* u dammai. <sup>14</sup> Ana Atakpaci, aza a na *a ri na Wilā* shi, a yuwain majiyan na aciyele *a* kuru ili i na *Wilā* u dammai, o roco *ta atsuma* o okolo e le e reve *ta* ili i na i ri mejege ni ili i wuya. <sup>15</sup> O to rocosu na *Wilā* u ri pe *atsuma* e le, adama a na okolo e le e te ge'etosu le, adama e iwuya i na aa yuwusan, ko adansa le a na a ta yuwusan ili i sa'ani. <sup>16</sup> Ili i nda suru i ta fara o urana u na *Asulā* ee ge'eto majiyan mo usokowu ma ama e ekere e Yesu Zamawawa. Alabari a Sa'ani a na maa yuwusan alajiya a damma *ta* ne.

### *Aza a Isra'ila na Wilā*

<sup>17</sup> *Na* *avu* za va Isra'ila *da*, vu ta zuwusa ucira *a Wilā*. Vu ta afalu *avu* vuma va *Asulā* *da langa*. <sup>18</sup> Vu reve *ta* ili i na u ciga nuwu vu yuwan ni ili i na waru vu revei *a* ri mejege, adama a na vu ritoi *Wilā*. <sup>19</sup> Vu ta zuwusa *avu* *da* voo ronuso nrumba *adanga* waru ne ekan a aza a na *a* ri e irumbu.

20 Vu ta zuwusa vu to roco olo ure u mejege, reve vu rito aza a na e revei ili shi. Vu ta na Wilā, adama o ndolo a da vu ri a majiyan vu reve ta ili biti waru vu reve ta amayun suru. 21 Vu to ritosu ozo o ro, to, adama a nye vu ritoi aciyawu shi? Vu ta dansaa ozo o ro she e iwa wan, avu gba a yuwusan wivu. 22 Vu damma unusu u da a yuwan tsipere, avu gba vu ta yuwusan ne. Vu damma u lobono a yuwaan amalī agandā shi, agba vu ta tsurusa ili i na yaa uwusa wu ure u na u ri ulobonu shi a a'isa e le. 23 Vu to uvadu a na vu ri na Wilā,† agba vu zuwa ama a tara Asulā ili i ro shi ana vu 'yuwain a kuru yi. 24 Ununa Adanshi a Asulā a dammai da, “Atakpaci a ta yuwusan adanshi a vama e ekere a Asulā adama a du.” ◇

25 Na avu za va Isra'ila da, avu vu yuwan ili i na Wilā u dammai vu yuwan, na a pada wu uryumbu, ulinga we pere u da shi. Amma na vu kuru Wilā shi, unata u da u ri na a shi a pada wu uryumbu shi. 26 A tsu pada Atakpaci uryumbu shi, agba na a yuwan ili i na Wilā u dammai, Asulā a tara le ta gashi a pada le ta uryumbu. 27 Asulā e te ge'eto du aza a Isra'ila, adama a na Atakpaci na aciyele a ta kurusu Wilā'a. I ta na Wilā, waru i ushi ta mapada mo uryumbu,† agba avu i 'yuwan a kuru Wilā. A ta kurusu Wilā ko na a pada nle uryumbu shi.

28 O una u na ama a tarai avu za va Isra'ila da, avu waru a pada wu uryumbu, ili i ndolo i kambato wu za va Isra'ila va amayun shi. 29 Ne da shi, za va Isra'ila va abulā ayi da za na okolo a yi a ri mejege na Asulā. Uryumbu wa amayun ayi da mapada mo ukwan ma lipu shi, amma ayi da

◇ 2:24 Isha. 52:5; Izk. 36:22.



uvadalasa wo okolo za na ulinga u Ruhu va Asula da. Agba uvadalu u ndolo ulinga u Wila u na a danai da shi. Cu'un vuma ndolo ta tsurusa ica e ekere a Asula, agba e ekere a ama shi.

### 3

<sup>1</sup> Ele aza a Isra'ila a ta ni ili i na akapi a ama a ri na ayi shi? Ulobonu u ne u da na a pada le uryumbu? <sup>2</sup> U tu ulobonu e re na abunda! Ure wu ufaru ayi da Asula a lyawa ta ikaka ya yi e ekere a aza a Isra'ila.

<sup>3</sup> Amayun a da ozo o ro e le a usu ikaka'a shi. Ayi ndolo ta gura putsaa a na Asula a yuwan ili i na u yuwain nzuwulai? <sup>4</sup> Ko ke'en! Ko na ama suru oo o'wo aza e epen, Asula za va amayun da. Adanshi a Asula a yuwan ta adanshi adama a yi, “Mantsa ma na vu yuwain adanshi suru, ama suru e te reve a na amayun a da wu.

Mantsa ma na a tara nuwu a 'yawa ubata wu uge'etosu, vu ta lyuwa aci e le.” ◇

<sup>5</sup> Ama o ro a tsu damma ta, “Na tsu yuwan unusu, u to rocosu a alanga e eteshe a na Asula a abula a da. Adama o ndolo na Asula a ca tsu atsumalima reve tsu damma u nusaan tsu ta.” (Ne da ama aa gura damma.) <sup>6</sup> Mawasan ma nda amayun a da shi! Na amayun a da a na Asula a tsu yuwan isa'ani kuci shi, to, amayun waa gura yuwaan uvadi u nda uge'etosu shi. <sup>7</sup> Za ro waru tsu damma ta, “Na n yuwan epen, cine tsa da Asula a damma a na amu za vu unusu u da reve u ca mu oforo, ne epen a va o roco ta ili i na u dammai amayun a da reve u ca yi tsugbain?” <sup>8</sup> Na ne da,

---

◇ 3:4 Ica 51:4.

vu ta gura damma, “Lyawa tsu danai a yuwusan iwuya adama tsu cayi Asula tsugbain.” Ama o ro e isula tsu ta ana a dammai tsu ta yuwusan cu'un vu uritosu u ndolo. Amayun a da shi! Asula e te ge'eto le atsuma e ili i na aa yuwusan.

*Babu za va abula*

<sup>9</sup> To, cine tsa da atsu aza a Isra'ila, tsu ta tarasa tsu la'a ta akapi a ama a na a buwai? Ne da u ri shi, ko ke'en! Tsu roco ta de unusu† u ta gubusa aza a Isra'ila obolo na Atakpaci fo. <sup>10</sup> Adanshi a Asula a damma tsu ta,

“Babu za va abula.†  
Ko vuma ta.

<sup>11</sup> Babu za vu ugbozu.

Babu vuma na a zamishi Asula.

<sup>12</sup> Ama a vadala ta Asula ucina suru.  
Ama suru o o'wo ta ama e pere.

Babu vuma na aa yuwusan ili ya abula.

Ko vuma ta babu.” ◇

<sup>13</sup> “A tsu tawa ta nu ukwa adama a adanshi o una u le.

Adanshi e le a ta tapu ne epen.”

“Ili i na aa dansa a ta gashi tsukono tso yo.” ◇

<sup>14</sup> “A ta yuwusaan ama una na adanshi a na a ri uyo'o shi kuci.” ◇

<sup>15</sup> “Babu usan u da a tsu una ama.

<sup>16</sup> Ubata u na a tyoyi suru a tsu tawa ta nu ulungusu na atsumalima.

<sup>17</sup> A tsu yuwan ko ili i ta i na aa zuwa ama a yuwan nden n sa'ani na akapi a ama shi.” ◇

<sup>18</sup> “A uwwusa wovon wa Asula shi.” ◇

---

◇ **3:12** Ica 14:1-3; Ica 53:1-3. ◇ **3:13** Ica 5:9; Ica 140:3. ◇ **3:14** Ica 10:7. ◇ **3:17** Isha. 59:7-8. ◇ **3:18** Ica 36:1.

<sup>19</sup> Tsu reve t̄a ili i na Wilā u dammai suru, u ta yuwusan adanshi a ama a na Asulā a cayi Wilā'a. Ne da u ri adama ama a tsurā ure u motaa wan, waru uvadi suru u reve u t̄a nu unusu a makakan ma Asulā. <sup>20</sup> Ko za lo na a gura yuwan ili i na Wilā u dammai suru shi, adama o ndolo Wilā'a waa gura zuwa tsu tso o'wo aza a abula shi. Ili i na Wilā waa yuwusan ayi da u zuwa tsu tsu reve cu'un vu nusu na tsaa yuwusan.

*Asulā a kambato tsu t̄a aza a abula*

<sup>21</sup> Amma gogo Asulā o roco t̄a ure u ro ko'o a na waa tarasa ama aza a abula. Wilā'a ni idana ya Amasulā a yuwan t̄a adanshi adama o ure u nda, amma utonishi u Wilā wa Musa u da shi. <sup>22</sup> Asulā a ta tarasa ama aza a abula na a ushi Yesu Zamawawa za na aa za'wa nusu le. Vuma suru to o'wo za va abula e ekere a Asulā o ure u nda, ko cu'un vuma ne da u ri.

<sup>23</sup> Ama suru a yuwan t̄a unusu reve a gasa a tsugbain tsā Asulā. <sup>24</sup> Amma Asulā a ta tarasa le aza a abula adama e isa'ani i na u cayi une'e pere. U yuwan t̄a ili i ndolo e ekere e Yesu Zamawawa, za na kambato ntsu faan ana wu za'wai nusu tsu. <sup>25-26</sup> Asulā a ca t̄a Yesu Zamawawa wo o'wo kucif na a tawaa na nsalalai, o ure wu ucasu wo okolo e ekere a mpasa ma yi. Asulā a yuwan t̄a ne adama u roco u t̄a mejege, ana de na acapa u yuwain ankuri, reve u sakato nusu va ama. Agba gogo u t̄a mejege ana waa tarasa za vu unusu na biti usuyi Yesu za va abula e ekere a yi.

<sup>27</sup> Tsu t̄a ni ili i na yaa zuwa tsu tsu 'yasan avan-gaci adama a aciyatsu? O'lo, ana Asulā a usu ntsu, adama e isa'ani i na tsu yuwain da shi. Amma

adama o ucawu wo okolo a tsu a da. <sup>28</sup> Asulā a zuwa tsu ta tso o'wo mejege na aciyayi adama a na tsu usuyi, amma adama a na tsu toniyi Wilā u da shi. <sup>29</sup> Asulā a aza a Isra'ila a da goon? O'o, ne da shi! Ayi fo Asulā a Atakpaci a da? Ee, ne da da! <sup>30</sup> Asulā a ta a da a ri lo, waru ure u ta u da u ri lo a na u tsu usu ama. U tsu kambato ta ama mejege na aciyayi goon na a usu. U balā ko ele aza a Isra'ila a da ko ele Atakpaci a da shi. <sup>31</sup> Gogo a na tsu ri nu ucawu wo okolo, to, tsu ta vari Wilā'a? Ko ke'en! Ucawu wo okolo u tsu zuwa tsu ta tso o'wo na amayun e ili i na Wilā u ciga ntsu tso o'wo.

## 4

### *Ucawu wo okolo a Ibrahim*

<sup>1</sup> Nye tsaa damma a na akaya a tsu Ibrahim ritoi adama o ucawu wo okolo? <sup>2</sup> Na Asulā a tara yi za na ri mejege adama e ili i na u yuwain, to, u ta dana ni ili i na waa yuwaan afalu. Agba waa yuwan ne e ekere a Asulā shi. <sup>3</sup> Adanshi a Asulā a damma, "Ibrahim ca ta Asulā okolo, adama o ndolo a da Asulā a kece niyi za va aḅulā." ◇

<sup>4</sup> Na vuma linga, a ciga a 'yuwan a tsu tsupa yi ta adama o ulinga u na u yuwain. Ikebe i ndolo une'e u da shi. <sup>5</sup> Agba vaa zuwa Asulā a tara wu za va aḅulā† adama e ili i na vu yuwain shi. Asulā a tsu tara ta aza o unusu aza aḅulā goon adama a na a ca niyi okolo. <sup>6</sup> Ne da fo Dawuda dammai ana u yuwain adanshi a mazanga ma vuma na Asulā e kecei za va aḅulā, ko na wo o'woi aḅulā'a adama e ili i na vuma'a u yuwain da shi:

---

◇ 4:3 Ufr. 15:6.

7 “Ama a na a yuwain ili i wuya i na Asulā a yuwayin gafura, a ta na mazāngā ma amayun. Asulā a tawa ta unusu u le.

8 Ama o ndolo a ta na mazāngā, aza a na Asulazuva aa cuwusan nu unusu u le waru shi.” ◇

9 Mazāngā ma na Dawuda yuwain adanshi a yi, wo o'wo ta za va aza a na a padai uryumbu goon? O'o, ko ke'en! Wo o'wo ta za va aza a na a padai uryumbu shi fo. Adama a na tsu damma ta de ili i na Adanshi a Asulā a dammai, “Ibrahim ca ta Asulā okolo, reve gba Asulā e kece yi za va abulā.”

10 Cine tsa da ili i nda i farai? Asulā a ushi ta Ibrahim kafu a pada yi uryumbu, ko cina a pada yi? Asulā a ushi yi ta kafu a pada yi uryumbu.

11 Uryumbu'u iroci i da na Ibrahim cayi de okolo waru Asulā a ushi yi ta de reve u kece yi za va abulā, ko kafu a pada yi uryumbu. Adama o ndolo Ibrahim da dada va aza a na a cayi okolo e le, agba a pada le uryumbu shi. O o'wo ta aza a abulā e ekere a Asulā adama o ucawu wo okolo e le. 12 Waru Ibrahim dada va aza a na a padai uryumbu da fo, amma she na a ri na cu'un vu ucawu wo okolo a na Ibrahim shi na ayi kafu a pada yi uryumbu.

*Nzuwulai adama aza na a ri nu ucawu wo okolo*

13 Asulā a yuwaan ta Ibrahim na muwun n tsukaya ma yi nzuwulai n na waa ca le uvadi. Asulā a yuwan ne adama a na Ibrahim kuruyi Wilā shi, amma adama a na ucawu wo okolo a yi ubata wa Asulā u zuwa ta a tara yi za va abulā.

◇ 4:8 Ica 32:1-2.

14 Na ama a ushi ili i na Asulā a yuwain nzuwulai adama e itoni i Wilā, to, ucawu wo okolo wo o'wo t̄a ili ye pere. Waru nzuwulai mā Asulā a tyo ya Ibrahim wo o'wo t̄a ili ye pere fo. 15 Asulā a tsu yuwan t̄a upan na ama a kudā a kuru Wilā. Na wilā u shi lo shi, vuma shi a kudā wilā'a shi.

16 Adama o ndolo a t̄a ushi nzuwulai mā Asulā a mantsa ma na a cayi okolo. U ta casu yi pere, waru e reve t̄a a t̄a ushi yi. Na a kuru Wilā† wa aza a Isra'ila, ko a kudā a kuru yi, a t̄a ushi yi na a ri nu ucawu wo okolo tsa Ibrahim. Adama a na Ibrahim ayi da dada va aza a na a cayi okolo suru. 17 Ununa Adanshi a Asulā a dammai ana Asulā a dammai Ibrahim,† “N zuwa wu t̄a vo o'wo dada vi idā ya abunda.” ♦ A yuwaan t̄a Ibrahim nzuwulai n nda adama a na u cayi Asulā okolo, za na tsu 'yaṣan akwakwa a kamba wuma reve waru u yuwan ili i sa'avu yu ut̄a atsuma e ili i na i ri lo shi.

18 Ana Asulā a yuwayin Ibrahim nzuwulai a na u to o'wo dada vi idā ya abunda, Ibrahim usu t̄a. Asulā waru a damma t̄a, “Muwun n tsukaya mā wu n to o'wo abunda tse italyo'o,” ♦ ko na wo o'woi cu'un vu nzuwulai n ndolo u rotso t̄a gashi waa yuwan shi. 19 Reve Ibrahim lyuwa elime nu ucawu wo okolo, ko na u shi na a'wan a na a rawai zuzu nu ukpaku, na a shi a putsaa yi a na wo o'wo dada. Saratu† ka v̄a yi fo u shi t̄a u kutsa, agba koto u shi u matsan shi. 20 Ibrahim zuwa t̄a okolo na Asulā a ta gura yuwan ili i na u yuwain nzuwulai, agba u bulā shi. Ucawu wo okolo a yi u shiton yi t̄a nu ucira, avu u ca Asulā tsugbain. 21 U tara t̄a suru suru na Asulā aa gura yuwan ili i na u yuwain

♦ 4:17 Ufr. 17:5. ♦ 4:18 Ufr. 15:5.

nzuwulai. <sup>22</sup> Reve gba adama o ucawu wo okolo a Ibrahim, “Asulā e kece yi za va aḅulā.”† <sup>23</sup> Ana Adanshi a Asulā a dammai “Asulā e kece yi ta za va aḅulā,” a dana yi adama a Ibrahim goon shi. <sup>24</sup> A dana ta ne adama a tsu fo, adama a damma tsu na Asulā ee kece tsu fo aza a aḅulā na tsu ca Asulā okolo, za na 'yaṣain Yesu Zagbain tsu atsuma a akwakwa. <sup>25</sup> Asulā a ca ta Yesu adama u kuwa adama o unusu u tsu, avu waru u 'yaṣan yi, adama Asulā a usu tsu.

## 5

### *Ucawu wo okolo u tsu tawa ta na mazanga*

<sup>1</sup> Asulā a usu tsu ta o ure wu ucawu wo okolo. Gogo tsu ta na asuvu nden na Asulā adama e ili i na Yesu Zamawawa Zagbain tsu yuwaan ntsu.

<sup>2</sup> U yuwaan tsu ta ure adama tsu uwa atsuma e isa'ani† ya Asulā adama a na tsu ushiyi Zamawawa. Tsu ta yuwusan mazanga adama a na tsu ta pe na akunda atsuma a tsugbain ta Asulā.

<sup>3</sup> Tsu ta waru na mazanga atsuma a addama, adama a na tsu reve ta ele nda a tsu tawa ta na makaḅa ma asuvu atsuma a tsu. <sup>4</sup> Makaḅa ma asuvu ma da ma tsu lapula tsu nden, waru ulapulu wu nden n daḅa u tsu tawa nu uzuwu wo okolo.

<sup>5</sup> Na tsu ri na cu'un vu uzuwu wo okolo o ndolo, woo rono tsu e ida shi. Ili i nda i fara ta adama a na Asulā a ca ntsu Ruhu va Akiza, za na shitoyin okolo a tsu ni icigi ya yi.

<sup>6</sup> Zamawawa kuwa ta adama a tsu mantsa ma na tsu kuḅai a kamba aciyatsu, ko na tsu danai aza o unusu. <sup>7</sup> Ili yu usan i da nanza ciga u kuwa adama u wawa nanza na aa kurusu Wilā. Amma

u ta gura o'wo u kuwa adama u wawa wuma wu za na a yuwasaan ozo o ro isa'ani kuci. <sup>8</sup> Amma Asula o roco tsu ta abajini e icigi ana u lyunguyi Zamawawa tsara u kuwa adama a tsu a mantsa ma na tsu danai aza o unusu.

<sup>9</sup> Gogo Asula e te keceshe tsu aza a abula adama a mpasa mu Zamawawa, waru tsu reve ta u ta wawa tsu o upan wa Asula. <sup>10</sup> Ko na tsu danai n'yuwatan ma Asula, u kambato tsu ta n'utsa ma yi, adama a na Mawun ma yi ma kuwai adama a tsu. Gogo a na tso o'woi n'utsa ma Asula, tsu reve ta amayun a da a na waa wawa tsu e ekere a wuma u Mawun ma yi. <sup>11</sup> Ayi ndolo da goon shi, amma tsu yuwan ta mazanga adama e ili i na Asula a yuwain e ekere a Zagbain tsu Yesu Zamawawa, za na kambato ntsu n'utsa ma Asula.

### *Adamu na Zamawawa*

<sup>12</sup> Unusu u uwa ta atsuma o uvadi adama e ili i na vuma ta yuwain, avu unusu'u u tawaa nu ukwa. Ayi da i zuwai ciga 'yuwan vuma suru kuwa adama a na vuma suru yuwain unusu. <sup>13</sup> Unusu u ta pa atsuma o uvadi kafu Asula a ca Musa Wila. Asula aa cuwusan nu unusu'u shi a mantsa mo ndolo, adama a na Wila u dana lo shi. <sup>14</sup> Amma diga a mantsa ma Adamu† a tyo a mantsa ma Musa, suru nle a kuwa ta, ko na koto a shi a 'yuwain a yuwan ili i na Asula a damma nle a yuwan shi, cine Adamu yuwain.

E re ro Adamu cu'un vu Zamawawa da za na tawai na acapa. <sup>15</sup> Amma ejere'e unata u da a ri shi, adama a na une'e wa Asula u ri tsu unusu wa Adamu shi. Amayun a da ama na abunda a kuwa ta adama o unusu u vuma ta ndolo. Amma isa'ani



ya Asulā i la'a t̄a mgbain lon, waru ama n̄a abundā a t̄surā t̄a une'e u vuma w̄a Asulā adama e isa'ani i vuma t̄a. Vuma ndolo ayi d̄a Yesu Zamawawa. <sup>16</sup> Waru ili i na une'e pere w̄a Asulā u t̄awayi u tawa t̄a ko'o ni ili i na unusu u vuma t̄a u t̄awayi. Ana Adamu yuwain unusu, Asulā a tsu ge'eto t̄a reve waru u ca at̄sumalimā. Amma Asulā a usu tsu t̄a adama o une'e wi isa'ani u na u cayi, ko tsu yuwan unusu w̄a abundā. <sup>17</sup> Unusu u vuma t̄a nda, ayi Adamu, u t̄awaa t̄a nu ukwā avu wo o'wo mogono e ekere a tsu. Amma ili i na Yesu Zamawawa yuwain la'a t̄a ili i ndolo n̄a abundā lon. Asulā a t̄a ni isa'ani lon e ekere a tsu, waru u usu tsu t̄a adama e Yesu. Adama o ndolo tsu t̄a t̄surā wuma reve tsu lyuwa aci o unusu nu ukwā.

<sup>18</sup> Unusu u t̄a wa Adamu u t̄awaa t̄a n̄a at̄sumalimā o ukwā a tyo a ama suru. Ne d̄a waru, ili ya abulā i t̄a i na Yesu Zamawawa yuwain u zuwa t̄a ama suru o o'wo mejege e ekere a Asulā. Ayi d̄a u t̄awayi n̄a wuma wa amayun e ekere a ama suru. <sup>19</sup> Adamu 'yuwan t̄a o toni Asulā, ne d̄a u zuwai ama n̄a abundā o o'woi aza o unusu. Avu Yesu Zamawawa yuwan tsutoni n̄a Asulā, waru u ta zuwa yi u kambato ama n̄a abundā aza a abulā a makakan mā yi.

<sup>20</sup> Amma Asulā a ca t̄a Wilā adama ama suru e reve cine a ri nu unusu. Amma a na ama a lyuwusa elime at̄sumā o unusu, Asulā waru a lyuwusa elime at̄sumā e isa'ani ya yi. <sup>21</sup> Unusu u ta yuwusan tsugono a aci a ama suru, reve u t̄awaa le nu ukwā. Ne d̄a waru gogo, isa'ani ya Asulā yaa yuwusan tsugono, waru u usu tsu t̄a adama e Yesu Zagbain Zamawawa tsu. Ayi ili i nda i d̄a i t̄awaa

ntsu na wuma u babu ukotu.

## 6

### *Unusu u ri nu ucira shi*

<sup>1</sup> Tsu ta majiyan tsu lyuwai elime na mayan mo unusu† adama isa'ani† ya Asula i lyuwa elime? <sup>2</sup> O'o, ko ke'en! E icigi yu unusu, to, a\_tsu akwakwa a da, adama o ndolo cine tsaa lyuwai elime na mayan mo unusu? <sup>3</sup> Yi icina ta na suru ntsu tso o'woi ili i ta na Zamawawa ana a rumbu ntsu? Ana a rumbu ntsu, tsu kuwa ta cine ayi u kuwai. <sup>4</sup> Ana a rumbu† ntsu, wo o'wo ta a cidu tsu ta obolo na ayi adama a na tsu kuwa ta obolo na ayi. Dada'a u zuwa ta Zamawawa kambisa wuma e ekere a tsugbain nu ucira wa yi. Ne da waru, u zuwa ntsu fo tso o'woi wuma ko'o o ure u sa'avu.

<sup>5</sup> Zamawawa kuwa ta, a\_tsu fo gba tsu boluloi ta na ayi o ukwa. Ne da gba Asula aa zuwa tsu tsu kambisa wuma ununa u zuwai Zamawawa kambisa wuma. <sup>6</sup> Tsu reve ta o una ta ama a na tsu shi nu ujimu a akpata† na Yesu adama a na unusu u lambai ucira wa yi atsuma a wuma u tsu. Asula a yuwan ta ne adama lipu vu nusu tsu a dashi o'wo agbashi o unusu wan. <sup>7</sup> Ne da u ri, mantsa ma na vuma kuwai biti u fatsa ta e ekere o unusu, unusu u ri nu ucira a aci a yi waru shi.

<sup>8</sup> Na tsu kuwa obolo na Zamawawa, tsu reve ta na tsaa dana wuma na ayi waru. <sup>9</sup> A 'yasan ta Zamawawa atsuma a akwakwa, agba tsu reve ta u buwa a kuwa shi. Ukwu u ri nu ucira a aci a yi gogo shi. <sup>10</sup> Ana Zamawawa kuwai, u kuwa ta u ta adama u lyuwa aci o unusu, agba waa dashi kuwa shi, ko ke'en. Gogo nda u ta na wuma u sa'avu,

waru wuma u sa'avu wā yi u to obolo nā Asulā.  
 11 Ne da waru, i tara aciyādu tsā akwākwa a tyo e  
 ili i na i ri unusu, agba i tā wuma obolo nā Asulā e  
 ekere e Yesu Zamawawa.

12 Adama o ndolo she i lyawa unusu u yuwusan  
 tsugono a aci a du pa o uvadi wan. She i kuru ili  
 i wuya i na i cigai i yuwan wan. 13 She i lyawa  
 upasu u na atsuma a lipu du wo o'wo ili i mayan  
 mo unusu wan. Amma o unā u ndolo, i ca Asulā  
 aciyādu suru suru adama a na i tā tsa ama a na  
 a shi ukwā, amma avu Asulā a zuwa du yo o'wo  
 wuma. I ca Asulā lipu du suru suru adama i yuwan  
 ili i na i ri mejege, waru reve i tawaa Asulā nā  
 tsugbain. 14 Unusu u buwa a yuwan tsugono a aci  
 a du shi. Isa'ani ya Asulā i da yaa yuwusan tsugono  
 tsā du, agba Wilā shi.

*Aagbashi a na aa yuwusan ili i na Asulā a cigai*

15 Adama o ndolo, u ta dansa tsu ta lyuwa elime  
 nu unusu faan, ana wo o'woi isa'ani ya Asulā i da  
 yaa yuwusan tsugono a aci a tsu, agba Wilā shi?  
 Ko ke'en, ne da shi! 16 I reve tā ili i na i dangwai i  
 toni suru wo o'wo tā zagbain du. I ta gura dangwa  
 unusu, za na tsu tawaa nu ukwā, ko i ta gura  
 dangwa i toni Asulā, avu yo o'wo aza a abulā e  
 ekere a yi. 17 De acaṣa, agbashi o unusu a da i shi.  
 Amma n godyo tā Asulā a na i toniyi uritosu u na i  
 usuyi i kuru mejege. 18 Asulā a baḍa du tā e ekere  
 o ucira wu unusu, avu yo o'wo agbashi a Asulā  
 adama i yuwan ili i na i ri mejege.

19 N yuwan tā adanshi ni iroci yi vadilima  
 adama i tara ili i na maa dansa babu usan. De  
 acaṣa, i lyawa tā aciyādu yo o'wo agbashi e ekere o

unusu ni iwuya. Gogo gba i ciga i 'yuwan i dangwa yo o'wo agbashi e ekere a aḅulā adama yo o'wo aza a akiza.

<sup>20</sup> De aḅapa, ana i shi agbashi o unusu, i shi adama e ili ya aḅulā shi. <sup>21</sup> Nye i ḅa i tsurai a mantsa mo ndolo a na i yuwusain iwuya? Gogo gba i ta uwwusa wono u le. Ili i ndolo ukwā u ḅa goon u tsu tawaa. <sup>22</sup> Gogo nda Asulā a baḅa ḅu tḅa e ekere o ucira wu unusu, reve yo o'wo agbashi a yi. Gogo i ta yuwusan ili i na yaḅ tawusa na nden ma akiza, reve i koso a wuma u na woo koto shi. <sup>23</sup> Atsupu o unusu† ukwā u ḅa, amma Asulā a ca tsu tḅa wuma u babu ukotu pere e ekere e Yesu Zamawawa Zagbain tsu.

## 7

### *Iroci ubatḅa u lolo*

<sup>1</sup> Ama a va, suru ndu i reve tḅa Wilā wa Musa. Adama o ndolo i reve tḅa na Wilā u tsu yuwan tḅa tsugono a aci a ama ele ubuwu wuma goon. <sup>2</sup> Iroci, na ka olo, wilā wu nḅa yi tḅa na vali va yi, na vali'i u ri wuma. Amma nu u kuwā, wilā u lolo u buwa wunlu na ayi shi. <sup>3</sup> Agba na wo olo vali ro vali va yi ubuwu wuma, Wilā u damma u ta yuwusan tsipere. Amma na vali va yi kuwā u tḅa faan e ekere a wilā u lolo, waru u yuwan tsipere shi, ko na wo olo vali ro.

<sup>4</sup> Ama a va, ne ḅa u ri ya'a ḅu. Wilā u buwa o tsugono a aci a ḅu shi, adama a na i kuwā tḅa o ucira wā yi ana i kuwai na Zamawawa a akpata.† Gogo gba i to oḅolo na za na a 'yasain atsuma a akwakwā, adama tsu yuwayin Asulā aganda. <sup>5</sup> De aḅapa, upasu u lipu u tsu za na ri nu unusu tsu

yuwan t̄a tsugono ts̄a tsu. Wil̄a u zuwa tsu t̄a tsu ciga mayan me ili i na i ri unusu u na u yuwain tsugono ts̄a lipu tsu. Waru adama o ndolo, ili i na tsu yuwain biti u t̄aw̄ato tsu t̄a o ukw̄a. <sup>6</sup> Agba Wil̄a u buwa a yuwusan tsugono ts̄a tsu shi. Tsu t̄a gashi akw̄akw̄a, waru Wil̄a w̄aa tsur̄a ucira a aci a tsu shi, ko ke'en. Gogo tsu ta gura yuwaan Asul̄a aḡand̄a o ure u sa'avu n̄a Ruhu v̄a yi o ronuso tsu adanga, agba a akuci o ure u Wil̄a u na a danai shi.

### *Wil̄a nu unusu*

<sup>7</sup> I t̄a dan̄a a majiyan gashi n ta dansa unusu n̄a Wil̄a ili i t̄a i da. Ne da u ri shi! Amma Wil̄a u da u zuwa numu n revei ili i na a tsu de unusu. Iroci, n shi n reve ili i na waa dansa she vuma ciga ili yi za ro shi wan, she na Wil̄a u damma numu she n yuwan ne wan. <sup>8</sup> Unusu u da u tsur̄a ure e ekere a wil̄a u nda, da da u zuwa numu n dan̄a n̄a tsushu'un icu'un icu'un. Na Wil̄a u shi lo shi, unusu u shi a tsur̄a ucira u nda shi. <sup>9</sup> Ko ili i shi i ba la mu shi kafu n reve ili i na Wil̄a u dammai u lobono t̄a n yuwan. Amma ana n reve niyi, n reve t̄a na n yuwain unusu waru za vu unusu da n shi, za na aa kuw̄a. <sup>10</sup> Wil̄a u na u shi a zuwaa mu wuma, ayi da u kambisai, u zuwaa numu ukw̄a.

<sup>11</sup> Unusu u tsur̄a t̄a ure u na waa pusan mu ugbozu, reve u yuwan ulinga n̄a Wil̄a'a adama wu una mu. <sup>12</sup> Suru n̄a ne, Wil̄a'a a aciyayi u t̄a na akiza, ili i na waru u dammai a t̄a na akiza n̄a mejege. <sup>13</sup> N ta dansa ili i na i ri ulobonu u ta zuwusaa mu ukw̄a? O'o, ko ke'en! Unusu u da u tarai ili i na i ri ulobonu reve u yuwan ulinga n̄a ayi adama u t̄awaa mu nu ukw̄a. Ili i nda i fara t̄a adama n reve ili i na unusu u rotsoi na amayun.

Ili i na i zuwai Wilā u ri lo ayi ḏa adama u roco na unusu ili i wuya i ḏa lon.

*Mpolo adama a yuwan unusu wan*

<sup>14</sup> Tsu reve tā Wilā ili i sa'ani i ḏa. Wilā u ḏa waa tāwusaa na addama shi, amma amu ḏa, adama a na amu vuma ḏa goon. Adama o ndolo, unusu u ta yuwusan tsugono a aci a vā gashi amu aagbashi a yi a ḏa. <sup>15</sup> N reve ili i na i zuwai maa yuwusan ili i na maa yuwusan shi. N ciga tā n yuwan ili i na i ri mejege na amayun, agba maa yuwusan yi shi. O unā u ndolo, reve n reme a yuwusan ili i na n 'yuwain. <sup>16</sup> N reve tā na ili i na maa yuwusan mejege ma ḏa shi, ayi nda u roco tā n usu tā Wilā u tu ulobonu. <sup>17</sup> Adama o ndolo amu ḏa maa yuwusan ili i wuya i nda shi. Unusu u na u ri nden atsumā a vā a ḏa a yuwusan le. <sup>18</sup> Upasu u wuma u vā u na u ri akuci nu unusu u lyawa mu n yuwan ili i na i ri ulobonu shi, ko ke'en. Ko nā n shi n ciga n yuwan ili i sa'ani, n tsu gura shi. <sup>19</sup> Nā n ciga n yuwan isa'ani, n tsu yuwan shi. Waru nā n ri o mpolo n kuḏa a yuwan unusu, reve gba me eneshe amu ḏa nda a yuwusan yi. <sup>20</sup> Agba nā maa yuwusan ili i na n cigai n yuwan shi, amu ḏa na amayun maa yuwusan yi shi. Unusu u na u ri atsumā a vā ayi ḏa waa yuwusan yi.

<sup>21</sup> Apa ili i na me enei a wuma u vā, nā n ciga n yuwan ili i sa'ani avu n cina aciyavā a yuwusan iwuya. <sup>22</sup> Okolo a vā a tā māzangā adama a wilā u na wu utai ubatā wā Asulā. <sup>23</sup> Agba reve n cina ubatā biti atsumā a vā ili i ro a yuwusan nlangi ni ili i na okolo a vā a cigai a yuwan, reve u kambato mu aagbashi o unusu u na waa yuwusan tsugono

tse ili i na maa yuwusan suru. <sup>24</sup> Adama o ndolo, okolo a va a danu shi! Zane da o utaa mu e ekere a lipu nda na aa zuwusa mu ukwa? <sup>25</sup> N godyo ta Asula adama e Yesu Zamawawa Zagbain tsu, ayi da za na wawa numu.

Nda cine n ri: o okolo a va, n ciga ta n kuru wila wa Asula, agba upasu u lipu va u na u cigai u yuwusan unusu, wo o'woto mu ta aagbashi o unusu.

## 8

### *Lyawa Ruhu va Akiza yuwan tsugono*

<sup>1</sup> Adama o ndolo, na adu aza e Yesu Kristi Zamawawa da, Asula ee ge'eto reve waru u kototo du shi. <sup>2</sup> Adama a na adu aza a yi a da, Ruhu va Akiza na tsu tawaa na wuma u bada du ta yo o'wo faan e ekere o ucira wu unusu u na u tsu tawaa nu ukwa. <sup>3</sup> Ayi Wila wa Musa u ri nu ucira u na waa wawa tsu shi, adama a na atsu na aciyatsu aza o unusu a da tsu danai. Amma Asula a yuwan ta ili i na Wila waa gura yuwan ne shi. U lyungu ta Mawun ma yi a tyo o uvadi na lipu tsa tsu, ili i na i tawai ko'o ayi da lipu tsu ta nu unusu. Asula o kototo ta ucira wu unusu u na waa yuwusan tsugono a lipu tsu, ana u ca ntsu Mawun ma yi tsa kucci adama a nusu tsu. <sup>4</sup> A yuwan ta ne adama a tsupa suru atsupu e mejege a na wila u dammai a aci a tsu, atsu na tsoo tonon Ruhu, agba tsa kurusu ili i na lipu cigai shi.

<sup>5</sup> Na ama a lyawa ili yu unusu i na ele a cigai a yuwan, i yuwan tsugono a aci e le, a tsu yuwusan ta majiyan mo unusu kuci. Amma aza a na a

lyawai Ruhu yuwain tsugono a aci e le, a tsu yuwusan t̄a majiyan me ili i na yaa zuwa Ruhu'u waa uwwa uyo'o u le. <sup>6</sup> Ni icigi i mayan me ili i wuya ma ḍa maa yuwusan tsugono a aci a vuma, u t̄a kuw̄a. Amma n̄a Ruhu ḍa a yuwusan tsugono a aci a vuma, u t̄a ḍana n̄a wuma na asuvu nden. <sup>7</sup> Ni icigi i mayan mo unusu ma ḍa maa yuwusan tsugono a aci a vuma, kuci ḍa waa yuwusan n̄angi n̄a Ḃsul̄a. U tsu toni ili i na Ḃsul̄a a dammai u yuwan shi. Amayun a ḍa, waa gura yuwan tsundolo shi. <sup>8</sup> Aza a na a lyawai she ili i na lipu le damma nle a yuwan ḍaḍa aa yuwusan, aa zuwa Ḃsul̄a a uwwa uyo'o u le shi.

<sup>9</sup> Amma aḍu i lyawa ili yu unusu u na i cigai i lyuwa elime a yuwusan tsugono a aci a ḍu shi. Amma Ruhu va Akiza t̄a pe nden aṭsuma a ḍu, amayun u ta yuwusan tsugono ts̄a ḍu. (Amma i cuwan za na ri n̄a Ruhu vu Zamawawa nden aṭsuma a yi shi, ayi za vi Itoni ḍa shi, ko ke'en.) <sup>10</sup> Lipu ḍu t̄a kuw̄a adama o unusu. Amma n̄a Zamawawa ri nden aṭsuma a ḍu, Ruhu ta ca ḍu wuma, adama a na Zamawawa kambato ḍu t̄a aza a aḍul̄a e ekere a Ḃsul̄a. <sup>11</sup> Ruhu va Ḃsul̄a na 'yas̄ain Yesu o ukw̄a t̄a pe nden o okolo a ḍu. Ayi na u 'yas̄ain Yesu o ukw̄a u ta ca lipu ḍu na a kuw̄a wuma, e ekere a Ruhu va yi na ri pe nden aṭsuma a ḍu'u.

<sup>12</sup> Adama o ndolo ama a va, tsu ciga tsu 'yuwan tsu yuwain nden n na Ruhu va Ḃsul̄a damma ntsu tsu yuwan. Tsu ciga tsu 'yuwan tsu yuwain cine tsu cigai tsu yuwan wan, adama a na aṭsu na aciyatsu aza o unusu a ḍa. <sup>13</sup> Ili i na i zuwai ayi ḍa, ni i lyuwa elime n̄a mayan mo unusu u na i cigai, i



tā kuwā. Amma ni i lyawa Ruhu kamba dū i lyawa mayan mo unusu, i tā tsurā wuma wa amayun. <sup>14</sup> Muwun ma amayun mā Āsulā ele dā aza a na Ruhu vā Āsulā o ronuso le adanga. <sup>15</sup> Adama a na Ruhu na Āsulā a ca ndū u kambato dū agbashi a na aa uwwa wovon shi. Amma, ayi Ruhu u kambato dū tā yo o'wo muwun mā Āsulā, waru ayi Ruhu'u u tsu ca tsu tā ucira u na tsāā shon a tyo ubatā wā Āsulā reve tsu damma, “Dada! Dada tsu!” <sup>16</sup> Ruhu vā Āsulā tsu ɓolo tā nā ruhu tsu, reve u roco amayun na atsu muwun mā Āsulā n dā. <sup>17</sup> Adama o ndolo, tsu tā tsurā ili i na wāa guzasa adama a ama a yi. Waru ili i na Āsulā a cayi Mawun mā yi suru, Zamawawa, aza a tsu a dā fo. Amma nā tsāā tsurā cu'un tsugbain tsa na Zamawawa tsurāi, tsu ciga tsu 'yuwan tsu sowo atsumalimā cine ayi fo u sowoi.

### *Tsugbain tsa na tsā ri lo a tawa*

<sup>18</sup> Nā tsu cuwan nā cu'un tsugbain tsa na waa ca tsu a tyo de, atsumalimā a na tsoo sowuso gogo ili i dā shi. <sup>19</sup> Ili i na Āsulā a yuwain suru a ta pura mantsa gogo na Āsulā oo roco a alanga e eteshe cine muwun mā yi n ri na amayun. <sup>20</sup> Āsulā a yuwaan tā ili i na u yuwain suru unā. Ili i na u yuwain dā a dangulai a yuwan tsundolo shi, Āsulā a dā a dangulai ne. <sup>21</sup> Nā tsundolo suru, Āsulā o fobo tā a na waa zuwa ili i na u yuwain o o'wo faan, waru tsarā a shama wan, agba o to o'wo faan reve a tsurā tsugbain tsā muwun mā Āsulā.

<sup>22</sup> Adama a na tsu reve tā diga o ufaru a tyo a mantsa mo gogo ili i na Āsulā a yuwain tā a manganā nā mɓalā, cine ka vā aatsuma tsu dānā nā aatsuma

a m̄bala nu u ciga u matsan. <sup>23</sup> Ko ātsu āza e Itoni tsu ta a m̄anga adama a m̄bala, ko na tsu ri na Ruhu va Akiza za na ayi da ufaru wu une'e wa Asula. Ātsu fo, tsu ta pura gogo urana u na Asula aa usu tsu ts̄a muwun ma yi suru suru, reve u kambato lipu tsu faan suru. <sup>24</sup> A wawa tsu ta, waru tsu ta nu uzuwu wo okolo a nda. Na tse ene ili i na tsaa pura, ayi ili i ndolo i dafa uzuwu wo okolo wa amayu'un shi. Ama a tsu zuwa okolo e ili i na a tsurai de shi. <sup>25</sup> Amma na tsu ri nu uzuwu wo okolo e ili i ro i na tsu ri na ayi ne'en shi, tsu to purosus yi na ankuri.

<sup>26</sup> Waru ayi Ruhu u tsu kamba tsu ta ātsu aza a na a ri babu ucira. Tsu reve cine tsaa yuwan avasa a na a ntsayi shi. Amma Ruhu na aciyayi tsu yuwaan ta Asula adanshi o una u tsu, waru u tsu pati ta Asula o una u tsu na m̄anga ma na ma la'ai ili i na vuma aa gura damma. <sup>27</sup> Asula e tse ene ta ili i na i ri pe atsuma o ookolo a vuma. Waru u reve ta ili i na i ri pe atsuma a asuvu a Ruhu, adama a na ayi Ruhu'u u ta yuwusan adanshi na Asula o una wa ama a yi cine Asula a cigai.

<sup>28</sup> Waru tsu reve ta Asula a tsu zuwa ta ili suru i linga obolo adama o ulobonu e ekere a aza a na a ciga niyi. Ele da ama a na u dey, adama a na ne da u foboi u yuwan. <sup>29</sup> Asula e reve le ta kafu u yuwan uvadi, waru u dangwa le ta tsara o o'wo tsa Mawun ma yi, adama Yesu Kristi Zamawawa wo o'wo umatsun wu ufaru reve waru u tsura azawawa'a a abunda lon. <sup>30</sup> Ana u dangwa nle, reve u de le a tawa ubata wa yi. Ana u de nle, reve u tara le aza a abula a makakan ma yi, reve waru u yuwaan le nzuwulai n tsugbain ts̄a yi.

### *Icigi ya Asula*

<sup>31</sup> Cine tsa da tsaa damma adama e ili i nda suru? Na Asula a ri obolo na atsu, babu za na aa gura lyuwa aci a tsu. <sup>32</sup> U putsaa na Mawun ma yi shi, amma u ca yi ta adama a tsu suru suru. Ana u ca ntsu de Yesu, to, amayun a da a na waa ca tsu ili suru. <sup>33</sup> Zane da aa yuwan adanshi a vama adama a ama a na Asula a dangwai? Ko vuma ta, adama a na Asula a da na aciyayi za na kambato nle mejege. <sup>34</sup> Zane da oo kototo ama a Asula? Ko vuma ta, adama a na Yesu Kristi Zamawawa kuwai, waru a 'yasan yi ta atsuma o ukwa, gogo waru u ta wuma o ukere usa'ani wa Asula, u ta yuwusan ipati ubata wa Asula adama a tsu. <sup>35</sup> Ko ili yi lo i na yaa gura kasa tsu ni icigi yi Zamawawa za na u ri na ayi a tyo ya'a tsu shi. Na tsu ri pe atsuma a addama, ko tsoo sowuso atsumalima, ko na ama o bongi tsu, ili i ndolo yaa kasa tsu ni icigi yi Zamawawa shi. Ko na tsu ri ni ili i na tsaa lyuwa shi, ko na tsu ri ni itana i na tsoo oto shi, ili i ndolo suru yaa kasa tsu in icigi yi Zamawawa shi. Ko na tsu ri atsuma e meleshe, ko na oo una tsu, ko ni ili i ndolo suru waa gura kasa tsu ni icigi yi Zamawawa shi. <sup>36</sup> Ne da da u ri cine Adanshi a Asula a dammai cida: "Usana suru ama a ta dansa a to una tsu adama a wu,

a ta yuwusan na atsu cine a tsu yuwan ni ikyon i na tarai a 'yawa ubata u na aa pada." ◇

<sup>37</sup> Amma ko atsuma e ili i ndolo suru, tsu ta nu ulyuwu wa aci suru suru e ekere a za na ciga ntsu!

<sup>38</sup> N reve ta amayun a da a na babu ili i na yaa gura kasa tsu ni icigi ya yi: Ukwā waa gura kasa

tsu na ayi shi, waru wuma waa gura shi. Nlingata ma Asula maa gura kasa tsu na ayi shi, ko otoni a lima. Ko ele cira va zuva† aa gura kasa tsu ni icigi ya yi shi. Ili i na yaa farasa gogo, ko ili i na yaa fara elime aa gura kasa tsu ni icigi ya yi shi. <sup>39</sup> Ko tsu ri zuva ve eleshe, ko tsu pe zala mala, u rotso ili i ro shi, adama a na babu ili i na i ri pa atsuma o uvadi u na yaa gura kasa tsu ni icigi ya Asula i na u roco ntsu e ekere e Yesu Zamawawa Zagbain tsu.

## 9

### *Asula na aza a Isra'ila*

<sup>1</sup> Amayun a da maa dansaa du. Amu za vu Zamawawa da agba epen a da mu shi. Ruhu va Akiza na asuvu a va a usu ta ili i na maa dansa amayun a da. <sup>2</sup> Okolo a va a ta atsumolangu na mballa lon <sup>3</sup> adama a ama a va, aza a Isra'ila cine n ri. Ko na Asula aa yuwaan mu unā reve wu kasa mu na Zamawawa adama ko aa tsura iwawi,† she n usu ni iladi Asula a yuwan ne. <sup>4</sup> Ele ama a Isra'ila a da, aza a na Asula a dangwai o o'wo muwun ma yi, u roco le ta tsugbain tsa yi, reve waru u yuwusan akucunu ne ele. U ca le ta Wila wa Musa. U damma le ta cine aa yuwan aganda a amayun. U ca le ta nzuwulai ma yi e ekere e le. <sup>5</sup> Nkaya n le ama a gbagbain a Asula a da a shi, Zamawawa a aciyayi mawun ma tsukaya me le ma da. Ayi waru Asula a da, za na aa yuwusan tsugono tse ili i biti! Ica za va yi da babu ukotu! Ami.†

<sup>6</sup> Maa dansa Asula a kuda ta a yuwan ili i na u yuwain nzuwulai na waa yuwan shi. Agba ama a Isra'ila suru da a danai ama a yi na amayun shi. <sup>7</sup> Waru muwun n tsukaya ma Ibrahim suru n

da Asulā a yuwayin Ibrahim nzuwulai shi. Asulā a damma tā Ibrahim, “Muwun ma Ishiyaku n da goon e de muwun n tsukaya ma wu.” <sup>8</sup> ayi nda u to rocosu a na muwun n tsukaya ma Ibrahim suru da muwun ma amayun ma Asulā shi. Muwun ma Ibrahim ma amayun ele da aza a na o o'woi muwun ma Asulā adama a nzuwulai n na Asulā a yuwayin Ibrahim. ◇ <sup>9</sup> Apa nzuwulai n na u yuwain: “A tyo nkoli a mantsa ma nda, n ta cina cina Saratu† matsan de ulobo.” ◇

<sup>10</sup> Mawu'un ayi da Ishiyaku† akaya a tsu. Ana u kungwai, reve u zuwa Rikatu,† za na matsain mpishe. <sup>11-12</sup> Agba kafu u matsan reve Asulā a damma yi, “Zakpara ta yuwaan zawa'a tsugbashi.” ◇ A yuwan tā ne kafu muwu'un n yuwan ili i sa'ani ko ili i wuya. Asulā a yuwan tā ne adama a na za na u dangwai ayi da za na u cigai adama e ifobi ya yi, agba adama e ili i na mawu'un u yuwain da shi. <sup>13</sup> Ununa Adanshi a Asulā a dammai, “N ciga tā Yakubu, agba n 'yuwan tā Isuwa.” ◇†

<sup>14</sup> To, nye tsa damma adama e ili i nda? Asulā a yuwan tā ili i na i lobonoi shi a tyo e ekere a ama biti? Ne da shi, ko ke'en!

<sup>15</sup> Asulā a damma tā Musa, “N to roco za na n dangwai biti isa'ani, waru n te ene iliyali yi za na n dangwai me ene.” ◇

<sup>16</sup> Asulā o to roco za na u dangwai biti isa'ani, agba adama e ili i na vuma'a cigai waru waa yuwusan da shi. <sup>17</sup> Adanshi a Asulā a damma tā, Asulā a damma tā mogono ma Masar, “N zuwa wu tā mogono adama a nda: N ciga tā n roco ucira

◇ **9:8** Ufr. 21:12. ◇ **9:9** Ufr. 18:10. ◇ **9:11-12** Ufr. 25:23. ◇ **9:13** Mal. 1:2-3. ◇ **9:15** Mta. 33:19.

u va ya'a wu, adama a yuwan adanshi a ala a va ubata bita atsuma o uvadi." <sup>18</sup> Adama o ndolo ye ene, Asula o tsu roco ta ozo o ro isa'ani adama a na u cigai u yuwan ne, waru u tsu dangwa ta u zuwa ozo o ro o o'wo aza a aciyogbamu.

*Isa'ani nu upan wa Asula*

<sup>19</sup> Nanza ta gura ece, "Cine Asula a tawaa tsu, nu u zuwa tsu yuwan cine u cigai tsu yuwan?" <sup>20</sup> She i damma ne wan! N'utsa n va, n te ecishe du, "Zane da yaa tarasa aciyadu a na i ri aa yuwusan mawasan na Asula? Upondo u tse ece ta ma'i va yi, 'Adama a nye vu ma'a numu tsunda?' " <sup>21</sup> Ma'i tsu ma'a ta ili i na u cigai u ma'a suru. U ta gura kene olo'o reve u ma'a matafa ma sa'ani adama a rana na a tsu linga na ayi langa goon, ili i ro waru gba shi adama a linga va ana'an na nfa'an.

<sup>22</sup> Ne da u ri na Asula. U ciga ta u roco upan wa yi adama ama e ene ucira wa yi a aci a za na suru wu ntsayi a lungusa yi. Amma reve wo o'wo u ta yuwusan ankuri ne ele. <sup>23</sup> U yuwan ta ili i nda adama u roco tsugbain tsa yi lon ana we enei iliyali ya ama, aza a na u fofoyi a ushi tsugbain tsa yi. <sup>24</sup> Atsu da gba ama o ndolo a na Asula e deyi. U dangwa tsu ta atsuma a ama a Isra'ila, agba ayi dada ne goon shi, waru u dangwa tsu ta fo atsuma a Atakpaci. <sup>25</sup> Cine Asula a dammai atsuma a aatagada a Hosiya, vumavasula:

"Aza a na a ri ama a va shi,  
Ele da mee de ama a va gogo.

Waru n to roco icigi  
a tyo ubata wa aza a na n shi n cigai shi." ◇

## 26 Waru

“De ubaṭa u na Asuḷa a damma nle,  
‘Aḍu ama a va a da shi,’

De da Asuḷa a wuma ee de le muwun ma yi.” ◇

27 Waru apa ili i na Ishaya† vumavasuḷa dammai  
adama a ama a Isra'ila:

“Ama a Isra'ila a ta abunda,  
vadamma wuyun wu nge'en m mala,  
agba wa'a da aa wawa atsuma e le.

28 Asulazuva a ta jika,

adama u ca ama o uvadi atsumalima suru suru.” ◇

29 Ishaya dammisa ta:

“Asulazuva Mogono me Ili Suru Suru

ma lyawa ta ama o gundo tsu wa'a a dana wuma.

Na ne da gba shi,

a ta lungusa tsu suru suru,

tse ilyuci yo Sodom na Gomora.” ◇†

*Aza a Isra'ila na Alabari a Sa'ani*

30 To, adama o ndolo nye tsa a damma adama e ili i ndolo? Ayi nda da: Atakpaci a yuwusan ukadu u na a zuwa aciyele aza a abula e ekere a Asuḷa shi, amma Asuḷa a da a zuwa nle aza a abula na aciyayi adama a na a ca ta okolo ya'a yi. 31 Ama a Isra'ila a yuwan ta ukadu o toni Wila adama o o'woto aciyele aza a abula na Asuḷa. Agba a gura shi. 32 Adama a nye a kudai? Adama a na a ciga ta a zuwa aciyele aza a abula e ekere e ili i na aa yuwusan, amma a zami yi nu ucawu wo okolo ubaṭa wa Asuḷa okolo mejege shi. Reve a karā a taḍatsasa a aatali a gbain a na a ri o ure u le. 33 Cine Asuḷa a dammai atsuma a Adanshi a yi:

◇ 9:26 Hos. 1:10. ◇ 9:28 Isha. 10:22-23. ◇ 9:29 Isha. 1:9.

“N ta zuwa aatali atsuma a Sihiyona.\*  
 Za na ama aa dana a tadatsasa.  
 U ta tsa aatali a na aa zuwa le a riya.  
 Agba za na ca niyi okolo waa uwwa wono shi.” ◇

## 10

<sup>1</sup> Ama a va, ili i na n la'a cigai, n ciga ta aza a Isra'ila suru a tsura iwawi. Avasa a va a da ndolo e ekere a Asula. <sup>2</sup> N reve ta a na a cigai a yuwaan Asula aganda, agba a tsura urevu <sup>3</sup> wi ili i na i tsu zuwa Asula a ushi ama shi. O una u ndolo, reve a yuwan ukadu u na a zuwa aciyele o o'wo aza a abula e re le. Reve a 'yuwan o toni ure wa Asula u na u tsu kambato ama aza a abula. <sup>4</sup> Zamawawa zuwa ta Wila wo o'wo babu ucira, adama o ndolo Asula a ta usu aza a na a cayi Zamawawa okolo suru.

### *Ama suru a ta gura tsura iwawi*

<sup>5</sup> Musa dana ta cine Asula a tsu zuwa ama o o'wo aza a abula adama a na oo tonon Wila. U damma ta, “Za na yuwain tsutoni ni ili i na Wila u dammai, u ta dana wuma.” ◇ <sup>6</sup> Apa nda ili i na Adanshi a Asula o ritoyi cine vuma o o'wo za va abula nu ure wu ucawu wo okolo: “She vu damma aciyawu wan, ‘Zane da aa 'yawa zuva?’ ” (Za na a dansa, “She vu damma aciyawu wan, ‘Zane da aa 'yawa zuva avu u tara Zamawawa a cipa o uvadi?’ ”) <sup>7</sup> “Waru she i damma wan, ‘Zane da waru aa cipa pe ubata wa akwakwa?’ ” (Za na a dansa, “She i damma wan, ‘Zane da aa 'yawa ubata wa akwakwa wu uta na Zamawawa?’ ”)

\* **9:33** Sihiyona aala o ro a da a Urishelima. ◇ **9:33** Isha. 8:14; Isha. 28:16. ◇ **10:5** N.Gn. 18:5.



<sup>8</sup> Apa ili i na Adanshi a Asulā a dammai: “Ikaka'a i ta zuzu na avu, u ta o unā wā wu no o okolo a wu.” Ayi da uritosu wu ucawu wo okolo u na tsaā dansa.

<sup>9</sup> Nā vu damma a alanga e eteshe, “Yesu Zagbain da,” waru nā vu usu ta o okolo a wu a na Asulā a 'yasan yi ta pe o ukwā, Asulā a ta wawa wu. <sup>10</sup> Tsu usu ta no okolo a tsu, waru adama o ndolo a da Asulā a kambato ntsu mejege. Avu tsu damma a alanga e eteshe tsu usu ta, waru adama o ndolo a da tsu tsurāi iwawi.† <sup>11</sup> Cine Asulā a dammai atsumā a Adanshi a yi, “Agba za na ca niyi okolo suru waa uwwa wono shi.” ◇ <sup>12</sup> Ayi nda ta yuwusan adanshi a za suru, adama a na babu ili i na i tawulai na aza a Isra'ila na Atakpaci. Zagbain ta da ri lo va koyan da. Waru u tsu zuwaa ta aza a na a yuwusan avasa e ekere a yi aba'un a abunda. <sup>13</sup> Cine Adanshi a Asulā a dammai, “Nā za de a ala a Zagbain suru, Asulazuva a ta wawa yi.” ◇

<sup>14</sup> Cine ama aa ca Zagbain okolo hali a pati yi u wawa le, nnā koto a uwwa a da a yi shi? Waru cine a uwwa, nā za ro damma le shi? <sup>15</sup> Waru cine aa 'yawa a damma le, nā Zagbain lyungu le shi? Adanshi a Asulā a damma ta, “Ili i mazanga i da lon na aza a na aa tawusa na a alabari a sa'ani a rawa.” ◇

<sup>16</sup> Aza a Isra'ila suru da a usuyi Alabari a Sa'ani'i shi. Iroci, Ishaya vumavasulā ece ta, “Asulazuva, vuma ro usu ta de ili i na tsu dammai?” <sup>17</sup> Ama a uwwa ta Alabari a Sa'ani'i ana nanza damma nle a da e Yesu Zamawawa. A tsu fara ta uwwa ikaka'a, reve a usu. <sup>18</sup> Amma te da aza a Isra'ila? A uwwa

◇ 10:11 Isha. 8:14; Isha. 28:16. ◇ 10:13 Juw. 2:32. ◇ 10:15 Isha. 52:7.

tā de ikaka'a? Ee, a uwwa tā! Adanshi a Asulā a damma tā:

“A damma tā ikaka'a a tyo ubāta wa ama suru. Waru a yuwan tā adanshi a yi bāta koko'o a alanga atsumā o uvadi.” ◇

19 Amma ama a Isra'ila e reve tā ili i na waa dansa na amayun gba? Ee, e reve tā, ko a mantsa ma Musa, Asulā a damma tā,

“N ta zuwaa ida i ro aba'un, reve i yuwan tsushu'un

N ta zuwaa olo Atakpaci aba'un, reve yu uwwa upan.” ◇

20 Ishaya yuwan tā adanshi babu wovon a na Asulazuva a damma tā,

“Aza a na a shi e izami i va shi, ele da aza a na a tsurā numu.

N roco tā aciyava a tyo ubāta wa aza a na a shi e ipati i na ee ene mu shi.” ◇

21 Waru Asulā a yuwan tā adanshi adama a aza a Isra'ila,

“Urana maḅulā n tsu bubaruwa tā ekere a va adama n ushi ama a na a ri na asuvu ug-bawu waru a 'yuwain o toni.” ◇

## 11

### *Asulā a yuwaan tā aza a Isra'ila isa'ani*

1 Adama o ndolo reve me ece: Asulā a 'yuwan tā ama a yi, aza a Isra'ila? Ne da shi! Amu na aciyava za va Isra'ila da. Amu maci va Ibrahim da, waru za vu ugundo wa Banyamiṭ u da. 2 Asulā a dangwa tā ama a Isra'ila o o'wo ama a yi de nu

◇ 10:18 Ica 19:4. ◇ 10:19 U.Wl. 32:21. ◇ 10:20 Isha. 65:1.

◇ 10:21 Isha. 65:2.

ujimu, waru koto u wasan le shi. I cuwan ta ni ili i na Adanshi a Asula a dammai adama a nda? Iliyaƙ vumavaſula yaƙa ta na adanshi a aci a ama a nda reve u damma, <sup>3</sup> “Asulazuva, o una ta amaſula a wu, waru a lungusa ta musa'a ma wu. Amu da vumavaſula na buwai a nde'en, agba a ta zama o una mu fo gogo.”  $\diamond$  <sup>4</sup> Waru i cuwan ta cine Asula a usuyi? U damma, “Avu da goon vu buwai shi. N ta na ama ukpakukupa ucindere (7,000) aza a na koto a kingyowayi amali Ba'aluƙ shi!”  $\diamond$

<sup>5</sup> Ne da fo u ri gogo. Ama a ta lo wa'a na Asula a dangulai adama e isa'aniƙ ya yi. <sup>6</sup> Waru nnu u dangula le, adama e isa'ani ya yi i da, agba adama e ili i ro na a yuwain da shi. Nno o to o'wo ama a Asula adama e ili i na aa yuwusan, une'e wi isa'ani ya Asula wo o'wo une'e wa amayun shi.

<sup>7</sup> Ayi nda u to rocosu ama a Isra'ila wa'a da, aza a na Asula a dangwai, a tsurai ili i na aza a Isra'ila suru a ri e izami. Agba akapi e le a ta na aciyogbamu. <sup>8</sup> Cine Adanshi a Asulaƙ a dammai: “Asula a ca le ta okolo a tsutamu. U rumbanato le ta adama e ene wan, waru u ula ta atsuvu e le adama a uwwa wan. Ne da gba hali n gogo.”  $\diamond$

<sup>9</sup> Waru Dawuda damma ta: “Lyawa abuki e le e reme le atsuma a maza me le, adama a taƙatsa reve a ushi atsumalima adama e ili i na a yuwain. <sup>10</sup> Lyawa esu e le a rumbana adama e ene wan, zuwa le a kaƙato zala vi itana yu ume u na aa cu'wan shi.”  $\diamond$

$\diamond$  **11:3** 1 Ngo. 19:10; 1 Ngo. 19:14.  $\diamond$  **11:4** 1 Ngo. 19:18.  $\diamond$  **11:8** U.Wl. 29:4; Isha. 29:10.  $\diamond$  **11:10** Ica 69:22-23.

<sup>11</sup> Adama o ndolo reve me ece: Ana aza a Isra'ila a riyai, uriyu u ndolo u lungusa le ta? Ne da shi! Adama a na a yuwain unusu, daɗa iwawi i taɗai ubata wa Atakpaci, ayi nda gba ayi da waa zuwa aza a Isra'ila a yuwan tsushu'un. <sup>12</sup> Na Atakpaci a ushi aba'un a abunda adama a na aza a Isra'ila a 'yuwain a mantsa ma na Asula a shi a cigai a wawa le, reve a mantsa ma na aza a Isra'ila a taɗa a ushi iwawi'i o ukosu, aba'un e le a ta la'a abunda.

### *Iwawi ya Atakpaci*

<sup>13</sup> Gogo n ta yuwusaan du adanshi adu Atakpaci. Asula a dangwa mu ta mo o'wo aajiya a Atakpaci, waru n ta yuwusan afalu adama o ulinga u gbain u na u ca numu n yuwan. <sup>14</sup> N ta zama ure u na maa zuwa aza a Isra'ila a ciga ili i na adu Atakpaci i ri na ayi, tsundolo tsa da maa tsura n wawa ozo o ro e le. <sup>15</sup> Ana Asula a vadalayi aza a Isra'ila ucina, wo o'wo ta i'utsa ya Atakpaci. Adama o ndolo ana Asula aa yuwisan tsu'utsa na aza a Isra'ila, u ta gashi a kambato ta aakwakwa wuma. <sup>16</sup> Na a ca Asula mabishi ma tsuwa, to, za va yi da mabula. Waru na a ca Asula aralu o udanga, eten o udanga'a suru za va yi da.

<sup>17</sup> U ta gashi a saza ta eten o ro o udanga u zetun.† Adu Atakpaci i ta gashi eeten e zetun a na a kungwai atsuma o ogozo a na e lebenuyi zuva vu udanga u zetun. Gogo i ushi ta ili i sa'ani i na i shi za va aza a Isra'ila cine eeten a sa'avu o tsu sowo mini ma yi diga a aralu o udanga. <sup>18</sup> Adama o ndolo she i yuwaan eten a na a sazai uvaɗu wan. Cuwain, adu da yaa banasa aralu o udanga a ndede shi. Aralu a yi a da a banasa du. <sup>19</sup> U ta gura wo o'wo i yuwan majiyan a na a sazai ete'en, adama

a zuwa đu o unā u le u đā. <sup>20</sup> Amayun a đā. A saza le tā adama a na a 'yuwain ā usu, āđu gba i buwa tā ubatā'ā adama a na i usuyi. She i 'yaṣan avangaci wan, amma yu uwwa wovon wi ili i na yaa gura fara. <sup>21</sup> Nnā Asulā a saza eten o ufaru o ndolo, ne đā waa gura kodo đu fo.

<sup>22</sup> Adama o ndolo ye ene tā Asulā ā tā ni isa'ani, waru u tu usuđuwu lon. U tsu ca tā aza a na a lyawai itoni yā yi atsumalimā. Ni i lyuwa elime nā nden cine woo roco đu isa'ani, to, u tā ā ri n rocosu đu isa'ani yā yi. Nnā gba i yuwan ne shi, u ta saza đu diga o uđanga'a. <sup>23</sup> Waru na aza a Isra'ila a zuwisa okolo e le ubatā wā Asulā, u tā kambatowisā le ubatā u na ā shi. U tā nu ucira u na waa yuwan ne. <sup>24</sup> Āđu Atakpaci i tā gashi eeten o uđanga u zetun† u na u kungwai atsuma ogozo u na o kodoi, reve e leḅenu yi zuva vu uđanga u zetun u sa'ani. Ne đā ili'i u ri shi! Amma a na wo o'woi aza a Isra'ila o ndolo ā tā gashi eeten a na a kungwai o uđanga u sa'ani, ā tā gba e leḅenuwishe le o uđanga'a babu usan.

### *Asulā a tsu yuwaan tā ama suru isa'ani*

<sup>25</sup> Ama ā vā, n ciga đu tā i reve ili yu usokowu i nda, adama i reve na koto i revei ili suru shi, waru adama i 'yaṣan avangaci wan. Aza a Isra'ila o ro ā tā na aciyogbamu, agba ili i nda i ta lyuwa elime hali she nā atyō a na Asulā a zuwayi Atakpaci a na a dāngwai, ā tawā ubatā wā Yesu Zamawawa. <sup>26</sup> Waru ne đā Asulā aa wawa aza a Isra'ila suru. Cine Adanshi ā Asulā a dammai:

“Zamawawa to utā Sihiyona,†  
reve u tawa iwuya suru diga o u'wa wa Yakubu.

<sup>27</sup> N ta yuwan akucunu a nda ne ele

na n tawa nusu le.” ◇

<sup>28</sup> Aza a Isra'ila a 'yuwan ta a usu Alabari a Sa'ani'i, adama o ndolo o o'wo ta n'yuwatan ma Asula. Ayi nda wo o'wo ta ne adama u kamba du, adu na i ri Atakpaci. Agba hali n gogo aza a Isra'ila ama a da a na Asula a dangwai, waru u ciga le ta adama a nzuwulai n na u yuwayin nkaya n le Ibrahim, na Ishiyaku na Yakubu. <sup>29</sup> Asula a tsu vadala okolo a yi a aci a ama a na u deyi ni ili i na u ca nle shi.

<sup>30</sup> De nu ufaru adu Atakpaci i 'yuwan ta o toni Asula. Amma a mantsa ma na aza a Isra'ila a 'yuwain o toni, reve Asula a yuwaan du isa'ani.

<sup>31</sup> Ne da waru u ri hali n gogo, aza a Isra'ila a 'yuwan ta o toni, adama o ndolo Asula a ta gura yuwaan le isa'ani cine u roco ndu isa'ani. <sup>32</sup> Asula a ciga ta u roco isa'ani a tyo a ama suru adama o ndolo u zuwa le ta o o'wo gashi aza a na a ri o u'wa wa ali adama a na a 'yuwain o toni.

### *Ica a tyo ubata wa Asula*

<sup>33</sup> Zane da aa gura rito utsuru, nu ugbozu, nu urevu u na Asula a ri na ayi?

Zane aa gura reve ili yo okolo a yi?

Zane aa gura cu'wuwa ili i na u tsu yuwan?

<sup>34</sup> Cine Adanshi a Asula a dammai,

“Zane revei okolo a Asulazuva?

Zane aa gura ca yi asala?”

<sup>35</sup> “Za ro ta ni ili i na woo tono Asulazuva, i na a ciga a 'yuwan u tsupa yi?” ◇

<sup>36</sup> Asula a yuwan ta ili suru.

Ayi da za na tsu zuwa ili suru i lyuwa elime.

◇ 11:27 Isha. 59:20-21; Isha. 27:9. ◇ 11:35 Isha. 40:13; Ayu. 41:11.

Ili suru i ta lo adama a ca yi tsugbain.  
Tsu 'yuwan tsu ciga tsu cuwa Asula babu ukotu!  
Ami.

## 12

### *I ca aciyadu e ekere a Asula*

<sup>1</sup> Ama a va, Asula a tu ulobonu, ayi da i zuwai n ri a patishi du i ca aciyadu e ekere a Asula tsa kucci, ni i ri wuma. I ca aciyadu kpara-kpara i yuwaan Asula ulinga waru i yo'onoto yi okolo. Ne da wu ntsayi i yuwaan Asula aganda o okolo a du. <sup>2</sup> She i lyuwa elime na mayan me ili i na ama o uvadi u nda aa yuwusan wan, amma, i lyawa Asula a ca du okolo a sa'avu. Ne da yee reve ili i na Asula a ciga ndu i yuwan: I te reve ili'i i tu ulobonu, ili'i waru i tsu yo'onoto yi ta okolo, na cine wu ntsayi.

<sup>3</sup> Asula o roco mu ta isa'ani, adama o ndolo n ta dansaa za suru atsuma a du: She vu tara aciyawu upasu na cine vu ri wan, amma vu yuwan majiyan ulobonu waru vu kalyuwa aciyawu cine Asula a ca nuwu ucawu wo okolo. <sup>4</sup> Tsu ta na pasu lipu abunda a lipu ta, waru pasu lipu nda suru tsu linga ta ko'o. <sup>5</sup> Ne da fo, tsu ta abunda, agba za suru upasu u lipu vu Zamawawa u da, waru atsu fo tsu tu ufoluloi ubata u ta.

<sup>6</sup> Asula a ca ta za suru atsuma a tsu une'e u na waa lingaa. Nu u ca tsu ucira u na tsaa yuwan alajiya e ikaka, tsu 'yuwan tsu ciga tsu yuwan yi nu ucawu wo okolo suru u na tsu ri na ayi. <sup>7</sup> Nu u ca tsu ucira u na tsaa yuwain aganda, tsu yuwain aganda. Nu u ca tsu ta ucira tsu yuwain uritosu, tsu yuwain uritosu. <sup>8</sup> Nu u ca tsu ta ucira tsu dashi ozo o ro okolo ugbamu, tsu dashi le okolo

ugbamu. Na tsu ta nu une'e wu ucasu, tsu ca no okolo a ta. Na Asula a zuwa wu ta zagbain, vu kambato ugbozu vu yuwan tsugbain ulobonu. Nu u ca wu ta ucira u na vaa yuwaan ozo o ro isa'ani, vu yuwan yi na mazanga.

### *Nden mu ulobonu*

<sup>9</sup> Vu ciga ama ni icigi ya amayun. Vu 'yuwan ili i na i ri iwuya, reve vu guza ili i sa'ani. <sup>10</sup> I cigalai cine wu ntsayi i cigalai na za va wu. I ciga i yuwunlai tsutoni gogogo. <sup>11</sup> She yo o'wo orogo wan, amma i yuwan ulinga ne ekere e re. I ca aciyaɗu kpara-kpara i yuwusaan Zagbain aganda. <sup>12</sup> I lyuwa elime na mazanga adama a na i ri nu uzuwu wo okolo. Ni i ri na addama i dana na ankuri. I yuwan avasa a mantsa suru. <sup>13</sup> I ca ama a Asula ili i na a lambai. I ushi omocin aza e Itoni a 'wa du.

<sup>14</sup> Na ama a zuwa du atsuma a atsumalima adama a na i ri aza e Itoni, she i yuwaan le unan wan. Amma i yuwaan le avasa Asula a zuwaa le aba'un. <sup>15</sup> I yuwan mazanga na aza a na a yuwusan mazanga, waru i shon na aza a na a ri e mesun. <sup>16</sup> I yuwan nden n sa'ani na aza a du suru. I yuwan tsu'utsa na ama a na a ri ili i ro shi. She i 'yasan avangaci ko i tara aciyaɗu i ta nu ugbozu wan.

<sup>17</sup> Na za ro nusaan du, she i tsupa yi ni iwuya wan. I yuwan ukadu i yuwan ili i na vuma suru ri e inda u ri mejege. <sup>18</sup> I yuwan atyo a na yaa yuwan tsara i yuwan nden mu uyo'o na ama suru. <sup>19</sup> N'utsa n va, she i ciga i ca ozo o ro atsumalima a na a nusaan du wan, amma i puro Asula a ca le



atsumalima nu upan wa yi. Asulazuva damma ta atsuma a Adanshi a yi,

“N ta ca aza a na a nusain atsumalima.  
N ta tsupa le adama e ili i na a yuwain.” ◇

<sup>20</sup> Amma i yuwan ili i na Adanshi a Asula a dammai:

“Na ma'yuwatan ma du ma ri na ambulu, i lyuwato yi.

Nu u ri na akuli, i ca yi mini mo oso.

Ne da waa uwwa wono wi ili i na u yuwaan ndu.”

◇

<sup>21</sup> She i lyawa iwuya i lyuwa aci a du wan, amma i lyuwa aci e iwuya na mayan me ili i sa'ani.

## 13

### *Iyuwan tsutoni na ngono*

<sup>1</sup> I yuwan tsutoni na ngono n na maa yuwusan tsugono a aci a du. Asula a da goon a ri nu ucira u na waa ca vuma tsugono, ayi da u zuwa nle o o'wo ngono. <sup>2</sup> Adama o ndolo aza a na a 'yuwain o toni wila u gwamnati, Asula a da a 'yuwain o toni. Adama o ndolo o to ronoo aciyele oforo. <sup>3</sup> Aza a na aa yuwusan isa'ani, aa dana a uwwusa wovon wu ngono shi, amma aza a na aa yuwusan iwuya, ele da aza a na aa uwwusa wovon u le. Babu ili i na yaa zuwa du yu uwwa wovon u le. I yuwan ili i sa'ani, ni i yuwan tsundolo ele a ta cuwa du.

<sup>4</sup> Mogono aagbashi a Asula a da, waru ulinga wa yi ayi da u kamba du. Amma na yaa yuwusan iwuya, reve yu uwwa wovon wa yi, adama a na u ta nu ucira u na waa ca du oforo. Ana u tsu ca aza e iwuya atsumalima, ayi aagbashi a Asula a

◇ 12:19 U.Wl. 32:35. ◇ 12:20 Udm. 25:21-22.

ɗa. <sup>5</sup> Adama o ndolo i ciga i 'yuwan i yuwan tsutoni na azagbain a gwamnati, adama a na tsundolo tsa ɗa yaa yuwan aƙu i kanzu'wa oforo, waru adama a na ili i na yi ntsayi i yuwan ɗa ndolo. <sup>6</sup> Ayi ɗa i zuwai yaa tsupusa utafa. Ngono agbashi a Asulā a ɗa, waru a tsu ushi ta atsupu tsara a gura yuwan ulinga u na Asulā a zuwa nle. <sup>7</sup> I tsupa le ili i na oo tonon du suru. I tsupa ko cu'un vu utafa ne ɗa suru. I ca le tsugbain waru i yuwan tsutoni ne ele suru.

### *I ciga ama*

<sup>8</sup> She i lyawa nanza toni du ili i ro wan. Ili i ta i ɗa goon na ni i ciga i 'yuwan i yuwan, ayi ɗa i cigalai, adama a na vuma na cigai ama u to tonishi Wilā suru. <sup>9</sup> Wilā'a u damma ta, "She vu yuwan tsipere wan. She vu una nanza nu ucigu wa wu wan. She vi iƙa wan. She vu zuwa okolo e itana yi za ro wan." Amma wilā u ta u ta lo za na dammai unata na aza a nda: "Vu ciga nron mu nden ma wu cine vu cigai aciyawu." <sup>10</sup> Na vu ciga ama, vaa yuwaan le iwuya shi. Na vu ri ni icigi ya ama vu to tonishi ili i na Wilā u dammai.

<sup>11</sup> Ni i ciga i 'yuwan i yuwan ili i nda adama a na i reve ta cu'un mantsa ma na tsu ri. Mantsa ma na u lobonoi i 'yon gogogo atsuma a nlavu a ɗa, adama a na iwawi i tsu i la'a ta zuzu na mantsa ma na tsu fara cayi okolo. <sup>12</sup> U yuwan ta gashi ayin a ciga ta o koto, waru usana u ciga ta matawaa. Adama o ndolo tsu lyawai a yuwusan ili i na aa yuwusan atsuma e irumbu, reve tsu tarai itana i na tsaayuwayin uvon atsuma e ekan. <sup>13</sup> I yuwan wuma u du ulobonu, cine ama a tsu yuwusan nu urana.

◇ **13:9** Mta. 20:13-15; Mta. 20:17; N.Gn. 19:18.

She i yuwan iwuya a mantsa mā abuki wan. She yoo o'wo ososowi wan. She i yuwan tsipere icu'un icu'un wan. She i yuwan nlangi vani du wan. She i yuwan tsushu'un no ozo o ro wan. <sup>14</sup> Amma i lyawa Zagbain Yesu Zamawawa rono du adanga a wuma u du suru suru. Reve waru i lyawa ifobi yu ure u na yāa tsurā ili i wuya i na i cigai.

## 14

### *She i ge'eto ama wan*

<sup>1</sup> I ushi aza a na ā kurusu Zagbain, ko na aza a na ucawu wo okolo u le u ri nu ucira shi da. She i yuwan mawasan ne ele adama e ili i na a tarai u na u ri ulobonu ko ulobonu shi wan. <sup>2</sup> Iroci, nanza tara tā unusu u da shi na a lyuwa ko cu'un vi ilyalya i na ā tsurāi biti. Agba za na ucawu wo okolo ā yi ā ri nu ucira shi, u tsu tama nama na u tsurāi suru shi. <sup>3</sup> Aza a na a tsu lyuwa ko cu'un vi ilyalya i ne da ā tsurāi, a ciga a 'yuwan o goro aza a na a 'yuwain a tama inama wan. Waru aza a na a tamusa inama shi, a ciga a 'yuwan a tara gashi aza a na a lyuwusa ilyalya a yuwan tā unusu wan, adama a na Asulā ā usu tā vuma ndolo. <sup>4</sup> U ri ulobonu i yuwaan aagbashi a vuma ro uge'etosu shi. Zavu'wa vā yi da aa gura damma ko u ta yuwusan ulinga u sa'ani ko waa yuwusan ulinga u sa'ani shi. Ucira wu Zagbain u ta kamba aagbashi ā yi a yuwan ili i na wu ntsayi u yuwan.

<sup>5</sup> Azā e Itoni o ro a tara tā urana u ro u la'a tā urana u ro akiza, ozo o ro gba a tara tā urana suru unatā u da ā ri. I yuwan majiyan me ili i na yi ntsayi na aciyadu. <sup>6</sup> Aza a na a tarasa a na urana u ro u la'a tā urana u ro, a tsu yuwan tā ne adama

a na a ciga t̄a a ca Zagbain tsugbain. Ne d̄a waru aza a na a lyuwusa ilyalya icu'un icu'un a ri. O tsu godyoo t̄a Āsulā kafu a lyuwa, tsundolo tsa d̄a aa ca Zagbain tsugbain. Aza a na waru a 'yuwain a lyuwa ili suru a tsu ciga t̄a a ca Zagbain tsugbain reve waru o godyoo Āsulā.

<sup>7</sup> Adama a aciȳatsu a d̄a tsu ri wuma goon shi, waru tsu kuw̄a adama a aciȳatsu goon shi. <sup>8</sup> N̄a tsu ri wuma, adama a Zagbain a d̄a tsu ri wuma, waru n̄a tsu kuw̄a, adama a Zagbain a d̄a tsu kuw̄a. Adama o ndolo, n̄a tsu ri wuma ko tsu kuw̄a e ekere a Zagbain a d̄a tsu ri.

<sup>9</sup> Ili i na i zuwai Zamawawa kuw̄a reve waru u 'yon u kamb̄a wuma ayi d̄a adama wo o'wo Zagbain a aci a aza a na a ri wuma na aza a na a ri ukw̄a. <sup>10</sup> Adama o ndolo nye i zuwai yee ge'etosu aza a na a ri oo tono Zagbain? Waru nye i zuwai yoo ronuso aza a d̄u aza e Itoni e ida? Urana u t̄a lo a taw̄a a na Āsulā ee ge'eto tsu suru. <sup>11</sup> Āsulā a damma t̄a ātsum̄a a Adanshi a yi, “N kucina t̄a n̄a wuma u va, ama suru a t̄a kingyo a mak̄akan mā va. A alanga e eteshe a d̄a ama suru a damma a na āmu d̄a Āsulā.” ◇

<sup>12</sup> Ama suru a ta cuđuwa ili i na a yuwain a mak̄akan mā Āsulā, ni ili i na i zuwai a yuwain ne.

### *She i zuwa ama a riyā wan*

<sup>13</sup> Tsu ciga tsu 'yuwan tsu lyawa e ge'etosulei. O un̄a u ndolo, i dammulai u ri ulobonu i zuwa ama a tad̄ats̄a avu a riyā ātsum̄a o unusu shi. <sup>14</sup> Āmu n tu ubolu n̄a Yesu Zagbain, adama o ndolo n reve

tā ilyalya suru a tu ulobonu u na a gura lyuwa le. Nā vuma tara ili i ro i ri ulobonu shi, to, ili i ndolo unusu u da e ekere a yi. <sup>15</sup> Voo rocosu icigi shi nā vu lyuwa ilyalya i na yaa zuwa za vi Itoni ro riya. She vu lyawa ilyalya i na vaa lyuwusa u lungusa vuma na Zamawawa kuwai adama a yi wan! <sup>16</sup> She vu lyawa ili i na vu tarai u ri mejege ma da u kambā ili i na ama o ro a tarai ili yi idaba wan. <sup>17</sup> Nā vuma ro yuwan adanshi adama o tsugono tsā Asulā waa yuwusan adanshi adama a wilā o unā wa alya e ilyalya no oso shi, amma gba u tsu yuwan tā adanshi adama a aḅulā, na asuvu nden, nā maḅāngā ma na Ruhu va Akiza a casu. <sup>18</sup> Ni i yuwaan Zamawawa aḅāndā o ure u nda, i tsu zuwa tā Asulā a uwwa uyo'o waru ama a tā usu dū fo.

<sup>19</sup> Adama o ndolo, tsu ciga tsu 'yuwan tsu yuwan aṭyo a na tsa a yuwan tsu yuwan ili i na i tsu tāwāa nā nden ma asuvu, waru ni ili i na i tsu kambulai e isawan ugbamu. <sup>20</sup> She i lungusa ulinga wā Asulā adama e ili i na yaa lyuwusa wan. I ta gura lyuwa ilyalya suru, amma unusu u da vu zuwa nanza yuwan unusu adama e ili i na vaa lyuwusa. <sup>21</sup> She i tama inama, ko i sowo maṛa, ko i yuwan ili i ro wan, nā wo o'wo i yuwan tsundolo u ta zuwa aḅā e Itoni o ro a riya.

<sup>22</sup> Atsuma e ili i na vaa yuwusan avu da nā Asulā a wu. Ama a tsu yuwan tā maḅāngā ne e reve ili i na a yuwusan mejege ma da, babu maḅalā adama a yi. <sup>23</sup> Amma nā a ri a maḅalā atsuma e ili i na aa lyuwusa, Asulā o kototo le tā na a lyuwa yi, adama a na e reve tā mejege ma da shi. Ni i yuwan ili i na i revei mejege ma da shi, i ta yuwusan unusu.

# 15

## *Vu yuwan ili i na vaa uwwa uyo'o goon wan*

<sup>1</sup> Ȧtsu na tsu ri nu ucawu wo okolo o ucira, tsu yuwain ankuri nȧ ȧzȧ e Itoni yi Zagbain aza a na ucawu wo okolo e le ȧ ri nu ucira shi. She tsu cigai tsu zuwa aciẏatsu na tsaa uwwai uyo'o goon wan. <sup>2</sup> Tsu yuwain ili i na yaa zuwa le a uwwa uyo'o, reve waru tsu yuwain ili i na yaa kamba le. <sup>3</sup> Ko Zamawawa yuwan adama u zuwa aciẏayi wu uwwa uyo'o shi. Amma cine Adanshi ȧ Ȧsul̇ȧ a dammai, “Ama a na e isulusa wu ȧmu̇ ḋȧ fo e isulusa.” <sup>4</sup> Ili i na a ḋanai suru ȧtsuṁȧ a Adanshi ȧ Ȧsul̇ȧ a ḋana le ṫȧ adama o rito tsu. Adanshi ȧ Ȧsul̇ȧ a ca tsu ṫȧ makȧbȧ ma asuvu, reve waru u ca tsu okolo ugbamu, adama tsu ḋanȧ nu uzuwu wo okolo.

<sup>5</sup> Ȧsul̇ȧ a ḋȧ za na tsu zuwa tsu tsu kȧbȧ asuvu, reve waru u ca tsu okolo ugbamu. N ta yuwusan avasa Ȧsul̇ȧ a kamba ḋu̇ adama i yuwan nden n sa'ani na ama, ȧtsuṁȧ e itoni yi Zamawawa. <sup>6</sup> Ne ḋȧ suru ṅdu̇ yoȯ boluloi ḋyȯ ḋu̇ i yuwaan Ȧsul̇ȧ ica reve waru i casu yi tsugbain, za na ȧyi ḋȧ Dada vȧ Yesu Kristi Zagbain tsu.

## *Alabari a Sa'ani adama a aza a Isra'ila na Atakpaci*

<sup>7</sup> Zamawawa usu ḋu̇ ṫȧ, adama o ndolo ȧdu̇ fo i usulȧi. Ne ḋȧ Ȧsul̇ȧ ȧȧ tsurȧ tsugbain. <sup>8</sup> N damma ḋu̇ ṫȧ Zamawawa yuwan ṫȧ ȧgandȧ ȧ tyo e ekere a aza a Isra'ila adama u roco nzuwulai mȧ ȧbundȧ n na Ȧsul̇ȧ a yuwayin nkaya n le amayun a ḋȧ. <sup>9</sup> Waru u ṫawȧ ṫȧ tsarȧ Atakpaci a ca Ȧsul̇ȧ ica

---

◊ 15:3 Ica 69:9.

adama e isa'ani i na u roco nle. Ununa Adanshi a Asulā a dammai:

“N ta cuwa wu e memere ma Atakpaci.  
N ta cana ica a tyo a aala a wu.” ◇

<sup>10</sup> Adanshi a Asulā a dammisa tā:  
“Zanganai, aḍu Atakpaci,  
oḅolo na ama a yi, aza a Isra'ila.” ◇

<sup>11</sup> Waru Adanshi a Asulā a damma tā:  
“Cuwai Asulazuva, suru ndu Atakpaci.  
Cuwa niyi, ama o uvadi suru.” ◇

<sup>12</sup> Reve vumavasulā Ishaya damma,  
“Nanza o u'wa u Mogono Dawuda† u tā tawa,  
u ta yuwan tsugono a aci a Atakpaci,  
waru a ta zuwa okolo e le e ekere a yi.” ◇

<sup>13</sup> N ta yuwusan avasa a tyo a Asulā, za na tsu  
ca uzuwu wo okolo, u shiton du na mazanga ma  
amayun na asuvu nden, a mantsa ma na i cayi  
okolo a du e ekere a yi. Ne da uzuwu wo okolo a  
du waa lyuwa elime o ucira u Ruhu va Akiza.

*Bulu yuwan ta adanshi adama o ulinga wa yi*

<sup>14</sup> Ama a va, n reve tā i tā tapu ni isa'ani. N reve  
tā waru i tā nu urevu u na wu ntsayi i dana na  
ayi, waru n reve tā i tsu gura tā ritoloi. <sup>15</sup> Amma n  
danaa du tā a alanga eteshe adama e ili i na n ciga  
ndu i cuwan. N yuwan tā ne adama a na Asulā a  
yuwaan mu tā isa'ani, <sup>16</sup> waru u ca mu tā ulinga  
u na moo o'wo aagbashi e Yesu Zamawawa a tyo  
uba†a wa Atakpaci. N ta yuwusaan Asulā tsug-  
bashi ana mo ritosu Alabari a Sa'ani a yi. N dana tā  
ana ganu† adama Atakpaci o o'wo kucci na Asulā  
aa ushi, kucci na Ruhu va Akiza kambato†i akiza.

◇ **15:9** Ica 18:49. ◇ **15:10** U.Wl. 32:43. ◇ **15:11** Ica 117:1.

◇ **15:12** Isha. 11:1.

17 Adama o ndolo, n ta yuwusan maṙaṙa adama e ili i na n yuwain adama a Aṙa aṙa e Yesu Zamawawa. 18 Maa yuwan adanshi adama e ili i ro shi, she ili i na Zamawawa yuwain e ekere a va, ana n zuwai Atakpaci a yuwan tsutoni na Aṙa. A yuwan ta tsutoni na ayi adama e ili i na n dammai ni ili i na n yuwain. 19 Waru o toni ta Aṙa adama o ucira wa abajini o ulinga wa asalama† u na e enei, na waru adama o ucira u Ruhu va Akiza. N yuwan ta alajiya a Alabari a Sa'ani aṙa a Urishelima hali a tyo alanga a Iliriku, adama o ndolo n koto ta de alajiya ubata suru. 20 N ciga ta n yuwan alajiya a Alabari a Sa'ani kuci ubata u na ama o ro koto a uwwai adama a Zamawawa shi, adama a na n ciga n yuwusan ulinga o ulinga u na nanza farai shi. 21 U ta cine Adanshi a Aṙa a dammai:  
 “Aza a na koto a damma nle adama a yi shi e te ene, waru aza a na koto a uwwai adama a yi shi, a ta tsura urevu.” ◇

### *Bulu ciga ta u bura Roma*

22 Ulinga u nda u da u shi u putsusaa numu a tawa ya'a du me ene du. 23 Gogo gba n koto ta ulinga u na maa yuwusan bata nda. N shi ta n ciga n 'yawa ubata u du nu ujimu. 24 N te ifobi n 'yawa Asibaniya, na ma kara, n ta batsa Roma.† N reve ta n ta uwwa uyo'o na m batsa me ene du, reve i kamba mu n reme ure. 25 Amma kafu me ene du, n ciga n 'yuwan n 'yawa ne'en Urishelima tsara n tara une'e a tyo aza e Itoni a na a ri de. 26 A'isa a aza e Itoni a na a ri Makidoniya na Akataya a ca



tā ikebe faan adama a kamba alambi a na a ri pe atsuma a aza e Itoni a Urishelima. <sup>27</sup> A uwwa ta uyo'o u na aa yuwaan le ne, adama a na une'e'e wo o'wo ta she damma atsupu o utan. O ufaru, Atakpaci a ushi ta isa'ani e ekere a Asula adama a aba'un atsuma a ruhu e ekere a aza a Isra'ila. Dada gba e enei u lobono ta a kamba le ni ili i na a ri na ayi. <sup>28</sup> Na n koto a casu ikebe i nda, n ta kalyuwa du, reve n kara a tyo Asibaniya. <sup>29</sup> N reve ta na n rawa ubata u du, Zamawawa ta ca mu abajini aba'un adama a du.

<sup>30</sup> Ama a va, n ta patishi du ankuri atsuma a ala e Yesu Zamawawa Zagbain tsu, i bolo ekere na amu atsuma o ulinga a yuwusan avasa a tyo ubata wa Asula adama a va. I yuwan ili i nda adama e icigi i na i ri na ayi a tyo e ekere a va na Ruhu va Akiza ca ndu. <sup>31</sup> I yuwan avasa adama a ama a na a ri e ida ya Yahuda aza a na koto a ushiyi Yesu Zamawawa shi, tsara a uwwato mu usan wan. Waru i yuwan avasa adama a aza e Itoni atsuma a Urishelima a yuwan mazanga ni ili i na n yuwain adama n kamba le. <sup>32</sup> Na Asula a usu, n ta tawa ya'a du na mazanga, waru ukalyuwusa u va a tyo ya'a du u ta zuwa mu mu uwwa uyo'o reve n tsura wivuwun. <sup>33</sup> Gogo lyawa Asula, za na tsu ca asuvu nden, u dana obolo na adu suru. Ami.

## 16

### *Bulu casa ta n'utsa mayi*

<sup>1</sup> N ta ni ili i sa'ani i na maa damma adama a Fibi, ka na a yuwusan aganda atsuma a aa'isa a aza e Itoni a Kankiriya. <sup>2</sup> N ta patishi du ankuri i ushi yi atsuma a Zagbain o ure u sa'ani u na ama a Asula

aa tsu yuwan. I kamba yi atsuma o ure u na yaa gura suru, adama a na u kamba mu ta na ama a abunda fo.

<sup>3</sup> I casa Birisika na Akila,  $\diamond$  aza a na a yuwain ulinga obolo na amu atsuma a tsugbashi tsa Yesu Zamawawa. <sup>4</sup> A usu ta a kuwa adama a kamba mu. N godyoo le ta lon, waru amu a nde'en shi a'isa a aza e Itoni a Atakpaci suru o godyoo le ta. <sup>5</sup> Waru, i casa mu aa'isa a aza e Itoni a na o tsu bolotosu atsuma o u'wa u le.

Waru i casa mu i'utsa ya amayun i va Abayinitu. Ayi da vuma na fara o'woi za vi Itoni e ida ya Asiya.

<sup>6</sup> I casa mu Meri, za na yuwaan du ulinga wa abula lon.

<sup>7</sup> I casa mu ama a va, Andranika na Juniya, aza a na a dana atsuma o u'wa wa ali obolo na amu. O o'wo ta aza e Itoni kafu amu, waru ajiya a ta casu le tsugbain.

<sup>8</sup> I casa mu Amfiliya, ayi i'utsa ya amayun i va i da atsuma e itoni yi Zagbain.

<sup>9</sup> I casa mu Uribanu, za na yuwayin Zamawawa aganda obolo na atsu.

I casa mu i'utsa ya amayun i va Isitaki.

<sup>10</sup> I casa mu Abali, za na rocoi amayun a da u toniyi Zamawawa.

I casa mu Aristobulu na ama o u'wa a yi.

<sup>11</sup> I casa mu Hiruduyan, moron ma va.

Waru i casa mu Nakisu na aza a na a ri atsuma o u'wa wa yi, aza a na a ri aza e Itoni yi Zagbain.

<sup>12</sup> I casa mu Tarafina na Tarafusa, amaci a na a yuwain ulinga u sa'ani adama a Zagbain.

---

$\diamond$  16:3 Agy. 18:2.

I ɔ́sáá mu náwáyí va amayun v̄a Barisisa, ka ro na yuwain ulinga u sa'ani adama a Zagbain.

<sup>13</sup> I ɔ́sáá mu Rufo, za na ri aagbashi a sa'ani adama a Zagbain. Waru i ɔ́sá mma v̄a yí, za na o'woi gashi mma v̄a.

<sup>14</sup> I ɔ́sáá mu Asinkirita, ná Filiguna, ná Hamisa, ná Baturoba, ná Hema, obolo ná ą́ą e Itoni a na ą́ ri obolo ne ele.

<sup>15</sup> I ɔ́sáá mu Fililugu, ná Juliya, ná Niriyu, ná mawun má ą́nawu mo usheli má yí, ná Ulumfa, obolo na ama ą́ ą́sulá a na ą́ ri obolo ne ele.

<sup>16</sup> I ɔ́saláí ni icigi yí Zamawawa.

Á'isá ą́ ą́ą e Itoni a Zamawawa suru ą́ tá ɔ́sáá ɔ́.

### *Morono ma atsvu mo ukosu*

<sup>17</sup> Ama ą́ v̄a, i kambuwa ugbozu u ɔ́ ulobonu adama a aza a na ą́ táwáá nu une'esun nu u'yásásan wa asuvu e ekere o úcawu wo okolo wa ama, reve o rito ili i ro ko'o ni ili i na i tsuráí. I suma le! <sup>18</sup> Aza a na a yuwusan ne a yuwusaan Zamawawa Zagbain tsu ą́gą́nda shi, amma a ta yuwusan ili i na aa uwwaa aciyele uyo'o. A tsu yuwusan tá ica ye pere, reve ą́ lumá ama a na e revei cu'un morono ma adanshi me iwuya ma nda shi. <sup>19</sup> ą́ą e Itoni suru a uwwa tá a na yaa yuwusan tsutoni e ekere a Zagbain, adama o ndolo n ta yuwusan mázą́ngą́ adama ą́ ɔ́. Amma n ciga ɔ́ tá i kambuwa ugbozu ą́sumá e ili i na i ri ili i sa'ani, amma gba i suma iwuya.

<sup>20</sup> ą́sulá a na gba ą́ tsu táwáá na asuvu nden, aa jima shi u ta minjira Male reve u ca ɔ́ ucira a aci ą́ yí.

N ta yuwusan avasa isa'ani ya Yesu Zagbain tsu danu obolo na adu.

<sup>21</sup> Timoti za na a yuwusan ulinga obolo na amu, u ta lyungusa du ni icasu ya yi. Waru ama a va fo, Lusiya, na Yason, na Susibatara a ta casasa du.

<sup>22</sup> Amu da Tatiyu, n ta danasa ili i na Bulu dammai n dana. Amu fo n ta casasa du atsuma a Zagbain.

<sup>23</sup> Gayu ta casasa du. U ushi mu ta obolo na aa'isa a aza e Itoni suru atsuma o u'wa wa yi.

Arasata, za vu uzuwa wi ikebe a lyuci gbain, ni i'utsa i tsu Kawata a ta casasa du fo.

<sup>24</sup> N ta yuwusan avasa Zagbain tsu Yesu Zamawawa u roco du isa'ani suru. Ami.\*

### *Avasa e ica*

<sup>25</sup> Tso cayi Asula tsugbain! U tso zuwa du ta yi isawan nu ucira atsuma o ucawu wo okolo a du, cine Alabari a Sa'ani a dammai. Ikaka i da adama e Yesu Zamawawa ni ifobi i na u sokoi nu ujimu.

<sup>26</sup> Amma gogo idana ya amasula a zuwa le ta e reve amayun a alanga e eteshe. Waru Asula, a na a tso kuwa shi, a zuwa ta uvadi mabula e reve amayun a nda, tsara a usu waru aa yuwan tsutoni na ayi.

<sup>27</sup> Lyawa Asula, za na ayi da goon u ri nu ugbozu, u ushi tsugbain o ure wa Yesu Zamawawa babu ukotu. Ami.

---

\* **16:24** Akuci a atagada o ro a ri nu uguzu u nda shi.

**Nzuwulai n Sa'avu na Tsishingini na adiva a  
na a dangulai a Nzuwulai mu Ufaru  
New Testament in Tsishingini (NI:tsw:Tsishingini)**

copyright © 2011 Wycliffe Bible Translators, Inc.

Language: Tsishingini

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Tsishingini

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

---

PDF generated using Haiola and XeLaTeX on 11 Nov 2022 from source files  
dated 29 Jan 2022

bb185c63-dc44-572c-ae93-66252c4dfa1e